

La lingua rumantscha: mes paun da mintgadi

pagina 6

«Samy selvadi» - e sia premiera a Donat

pagina 11

Ils impuls sin viadi han tutgà «sin il viv»

paginas 12 e 13

Buns resuns per la revista Accents

pagina 26

Editorial

Chara lectura, char lectur

Sisum la nova strategia da RTR sa chattan dus plects: PER VUS.

Per Vus lavurain nus tar RTR di per di cun schlantsch, motivaziun, luschezza e cun il plaschair da pudair servir al public rumantsch. En il center da nossa nova strategia stattan trais finamiras: 1) Nus vulain cundivider savida ed infurmaziuns e moderar competentamain las debattas en la societad. Nus crajain numnadamain ch'igl è impurtant per la convivenza en ina democrazia da debattar davart differents aspects d'in tema per lura pudair sa far in'atgna opiniun. 2) Nus vulain promover la cuminanza rumantscha e far part da quella, perquai che nus essan persvadids che RTR po colliar Rumantschas e Rumantschs en las valladas, en Svizra e sin l'entir mund. 3) Nus vulain preschentar la creativtad rumantscha sur il cunfin linguistic ora, oramai che nus crajain ch'igl è impurtant ch'il rumantsch saja visibel en tut la Svizra – e dal rest: puncto creativtad e talents pudain nus preschentar in'entira massa! Cun quests plans sperain nus da pudair realisar PER VUS vinavant in program divertent, infurmattiv e captivant. In grond grazia fitg per vossa fidaivladad e da cor paschavlas Festas, in'allegraivla fin dal 2018 e mo il meglier per l'onn nov.

Vossa Ladina Heimgartner



L'ultima seduta dal president partint da la SRG.R en il rom da la sentupada annuala tranter la suprastanza da la societad purtadra e la direziun RTR. Da sanestra ils commembers da la suprastanza SRG.R Donat Nay, Beatrice Baselgia, Gion Lechmann ed il president Oscar Knapp (sin la foto manca Gion Cola); il directur general SRG SSR Gilles Marchand e la direziun RTR cun la directura Ladina Heimgartner ed ils commembers Pius Paulin, Flavio Bundi, Beat Lozza e Gian Ramming (foto: Marco Cadonau).

Adia e grazia fitg ad Oscar Knapp

Suenter avair timunà la suprastanza da la SRG.R, la societad purtadra da RTR, durant ils ultims sis onns, è arrivà il mument per dir adia.

(sc) Ils 26 da matg ha Oscar Knapp manà a Landquart sia ultima radunanza generala da la SRG SSR Svizra Rumantscha (SRG.R). Avant ch'il temp d'uffizi va a fin, han gi lieu en l'Engiadina duas dietas che han era dà la chaschun d'engraziar e da pren-

der cumià dal president partint. D'ina vart è quai stà ina dieta dal cussegl d'administraziun da la SRG SSR a Scuol e da l'autra vart l'inscunter annual da la suprastanza da la SRG.R cun la direziun da RTR e cun il directur general da la SRG SSR a Lavin.

LRTV/RTVG e No Billag

En il rom da la dieta a Scuol ha Ladina Heimgartner, directura da RTR, tranter auter menziunà las duas fatschentas e votaziuns naziunalas ch'èn stadas centralas (cunt. pagina 2)

Giubileums da fatschenta

Schaner 2019

Rebecca Mori - 10 onns

Anna-Alice Dazzi - 5 onns

Favrer 2019

Federico Belotti - 10 onns

Andreas Wieland - 10 onns

Partenzas

October 2018

Reto Lazzarini

Fin da december 2018

Esther Bigliel

Riccarda Müller

Pensiunament

Fin da favrer 2019

Alexi Monn

Cordiala gratulaziun e grazia fitg per la lavur e la fidaivladad.

Nathalie Wappler daventa directura da SRF

(ssr) Il cussegl d'administraziun da la SRG SSR è suandà unanimamain la proposta da la suprastanza regiunala da la SRG Deutschschweiz ed ha elegi Nathalie Wappler sco nova directura da SRF a chaschun da sia sesida dals 5 da november. La directura da program dal Mitteldeutscher Rundfunk MDR surpiglia sia nova funcziun la primavaira 2019. Fin là maina Ruedi Matter (65) l'interpresa.

Nathalie Wappler Hagen è naschida l'onn 1968 a Son Gagl. Ella terminescha ses studi d'istorgia, ciencias politics e germanistica l'onn 1990 a l'Universitad da Constanza.

Ses emprims onns da professiun passenta ella sco redactura tar ARD (WDR), ZDF e sco scheffa



Nathalie Wappler, la nova directura da SRF, surpiglia sia nova funcziun la primavaira 2019.

d'ediziun tar 3sat. Dal 2005 fin la midada tar il MDR lavura Nathalie Wappler en differentas funcziuns

per SRF. Dapi il 2016 è Nathalie Wappler directura da program dal MDR.



Elisabetta Knapp-Preisig accompagna ses consort Oscar dapi onns cun pled e cussegl.

Adia e grazia fitg ad Oscar Knapp

(cunt. da pagina 1)

durant il temp d'uffizi d'Oscar Knapp sco president da la SRG.R: ina giada la votaziun davart la lescha da radio e televisiun (LRTV/RTVG) dals 14 da zercladur 2015 e lura la votaziun davart l'iniziativa No Billag dals 4 da mars 2018. Omaduas han pretendi fitg bler engaschi era da la SRG.R e da ses pre-

sident Oscar Knapp che ha visità numerusas occurrenz, manà discussiuns, tegnì plects, scrit brevs e tgrirà e nizzegià ses buns contacts. Ils cumbats da votaziun èn stads fitg intensivs, ma han manà ad in resultat positiv per la SRG SSR e consequentamain era per RTR. Ultra da quai ha il president era gi da tractar en ses temp d'uffi-

zi duas personalias impurtantas per RTR. Uschia è el stà a la testa dal gremi che ha elegi la directura Ladina Heimgartner (2014) ed il schefredactur Flavio Bundi (2017). Ed er en il cussegl d'administraziun da la SRG SSR è Oscar Knapp stà fitg bainvesì. Sco anteriur diplomat ha el adina chattà ils dretgs plects e ses scharm ed umor ha el era nizzegià per far attent a la situaziun speziala da la Svizra Rumantscha.

Betg senza Elisabetta

A Lavin, en il rom da la dieta da lavur cun la direcziun RTR, ha il directur general Gilles Marchand laschà passar revista ils puncts che han fatschentà la SRG SSR durant l'onn che va a fin ed el ha era dà in sguard en l'avegnir cun las numerusas sfidas che na vegnan betg a mancar a l'interpresa da medias. Ultra da quai ha la suprastanza da la SRG.R pudì prender enconuschientscha da las finamiras, dals projects e da las acziuns che RTR ha planisà per il 2019.

Betg mancà n'han la finala er a

Lavin ils plects d'engraziament. Uschia han Gilles Marchand e Ladina Heimgartner nizzegià la chaschun per drizzar plects persunals al president partint. Els han ludà l'engaschi nunstanclentaivel d'Oscar Knapp e menziunà las diversas staziuns da ses agir, dapi ch'el è vegnì elegi ils 2 da zercladur 2012 sco nov president da la SRG.R. En ses pled d'engraziament ha Ladina Heimgartner dentant mess quella saira il focus sin la consorta Elisabetta che accompagna Oscar Knapp dapi onns, e quai betg mo sco la dunna «davos», mabain sco ferma partenaria «sper» il diplomat e president SRG.R, e magari schizunt era sco quella che prenda per mauns las fatschentas sco patruna-chasa, giastadra e – cun sia moda e maniera directa e cordiala – sco partenaria da sparring en tuttas situaziuns. La fin da l'onn remetta Oscar Knapp uss il presidi da la SRG.R. Ses successur Vincent Augustin entra en uffizi il 1. da schaner 2019.

Alexi Monn – tuttas vias mainan a Mustér

Ils ultims prest 25 onns è el s'engaschè sco schurnalist, producent e responsabel D+A en chasa RTR. Ussa spetga ina nova sfida: la pensiun.

L'atun 1994, cura che Alexi Monn da Mustér ha cumenzà a lavurar tar RTR, sa chattava l'interpresa en svilup cumplain. Per l'ina eri stà pussaivel d'engaschar novs collavurats e d'installar biros regionalis er a Scuol ed a Glion, e per l'autra sa fatschentava RTR era cun l'installaziun da novas tecnologias. En il rapport annual da lez onn scriva il directur Chasper Stupan lura per exempel era: «Tar la produziun da las emisschiuns rumauntschas da radio ho il studio regional cuntinuo cul svilup tecnic. Nossas investiziuns tecnicas modernas as verificheschan e nossa rolla da pionierologic illa SSR vain arcugnuschida eir da las ulteriusas unteds d'interpresa». Sper la lavur schurnalistica ha lura era quest sector – quel da la tecnica e da l'informatica – adina puspè occupà Alexi Monn durant ils ultims onns. Uschia è el stà quel ch'è vegnì incumbensà recentamain d'iniziar in dals pli novs projects da RTR, quel da «l'intelligenza artificziala».

Mustér – Turitg – Mustér

Suenter las scolas a Mustér ha la via manà Alexi Monn a Turitg. Là ha el fatg in emprendissadi mercantil. La gronda citad na para dentant betg d'avair fascinà el enormamain. Suenter avoir terminà l'emprendissadi turnà el a Mustér e lavura en la Stampa Romontscha. Ed era là vegn

el già baud confruntà cun projects innovativs sco per exempel l'introduziun dal sistem electronic da contabilitad. Cun questa lavur cuntinuescha el er en ses nov lieu da lavur, in biro d'architectura e pli tard in biro fiduziar. Ed era silsuenter maina la via el puspè en vischinanza directa da l'electronica, en l'interpresa d'EED/EDV che sa fatschentava d'ina vart cun il svilup da programs sco era cun servetschs da fiduziari. L'affinitad per la tecnica, dentant era las experientschas ch'el aveva fatg sco redatur occasional da la Gasetta Romontscha en pia memoria, han animà el da s'annunziar per ina plazza en il sector da medias, en chasa RTR.

Cuira – Mustér – Cuira

Durant set onns è el redatur da novitads e realisatur da contribuziuns e d'emissiuns.

Di per di fa el il viadi da Mustér al plaz da lavur a Cuira, e quai – sco redatur da novitads – da tut temp. Il di da lavur cumenza savens la damaun baud a las 03:00, e lura hai num installar il letg plegabel e durmir in biro a Cuira. Sco persuna cun in'affinitad per l'informatica è el predestinà da s'occupar da la tematica che fatschentava la fin dal millenni l'entira umanità. En sia contribuziun radiofonica, ina Marella cun il titel «Dal 1999 al 2000», ha Alexi Monn tractà ina te-

matica – en quest mument – zunt actuala en vista a la midada dal millenni. El ha pruva d'explitgar quant fitg che noss mintgadi dependa da l'informatica e dal computer. Per questa emissiun è el lura era vegnì undrà da la CRR cun il Premi Cristal. Zunt bain – uschia il laudatur Jon Nuotclà – ha el rendì attent a lieus neuralgics che pudessan chaschunar incaps fatals durant la notg da Silvester sin Bu-maun 1999/2000. La quintessenza da l'emissiun realisada avant 20 onns d'Alexi Monn: Ì n'è betg necessari da cumprar chandailas per la notg da Silvester. Il mund fa era suenter la midada da l'onn vinavant ses gir enturn il sulegl.

Suenter esser s'engaschè sco coordinatur da las emissiuns d'infurmiations, daventa el a partir dal 2004 fin il 2008 responsabel dal di (redi) dal Radio Rumantsch, ina funcziun cumparegliabla cun l'actual producent. Da quel temp, da la dinamica e da la buna atmosfera en il team e tranter ils responsabels, da las pussaivladads da pudair installar novs systems tecnicos (systems da planisaziun e d'organisaziun da tut gener) raquinta el anc oz magari. Lura suonda la midada en Surselva. Cun sia experientscha, cun ses interess multifars e cun sia affinitad per tematicas regionalas è el predestinà da daventar correspondent cun biro a Mustér, ed il medem mument era

da surpigliar la responsabladad sco manader da la regiun Surselva e Grischun Central. Las mirveglias per novas sfidas ed incumbensas n'han dentant betg laschè paus ad Alexi Monn. Suenter bundant trais onns turna el puspè a Cuira, lavura danovamain en la redacziun d'infurmiations per surpigliar l'entschatta da l'onn 2013 la responsabladad per la partiziun Documentaziun+Archiv (D+A). Ed er en quest post vegn el puspè da cumbinar sias abilitads ed affinitads per la tecnologia ed il schurnalissem che han accompagna el durant quasi tut sia vita professiunala.

Mustér – ? – Mustér

Ed ussa maina la via Alexi Monn puspè en Surselva, a Mustér, en ses lieu da dimora. E da raschun na vegn el betg a nizzegiar il temp che stat uss a disposiziun per star laschent. Ils hobis na mancan betg: ir cun velo, dar golf, sfunsar e far viadis en pajais esters, forsa schizunt lontans. Ma la finala maina la via adina enavos en il lieu, nua che tut ha cumenzà, sisum la Surselva, en la sumbriva da la venerabla claustra da Mustér. Stimà Alexi, grazia fitg per tes engaschament e per tia fidaivladad e tut il bun per quai che spetga ussa tai. E sa chapescha che nus ans legrain da tias visitas che ti fas forsa mintgant er en il futur en chasa RTR.

Erwin Ardüser



Dapi 1994 fin oz è Alexi Monn s'engaschè en las pli differentas funcziuns en chasa RTR. Uschia per exempel sco responsabel dal team D+A, sco producent e redatur (sin la foto cun il Premi Cristal 1999) ubain sco correspondent regional en las profunditads dal tunnel dal Gottard.

4x4 = 16 mintgadis rumantschs

RTR ha purtretà quest onn 16 Rumantschas e Rumantschs. E la seria da purtrets ha mussà in maletg varià da la Rumantschia. A la fin da l'onn 2018 èn da vesair las ivettas.

(dt) «Samuel Bischof da Mustér disch d'inrar da na.» – «Tinet Michael da Valchava es cuntschaint sco 'Tinet il resgiader'.» – «Nicole Bundi viva là, ingio ch'oters fan vacanzas.» – Cun talas frusas han cumenzà ils set purtrets filmics realisads il 2018. Mintga stagiun ha la redacziun dals Cuntrasts preschentà quatter persunas rumantschas. Perquai il num: 4x4.

Da Valchava fin Mallorca

Las equipas da film dals Cuntrasts han visità e filmà ils protagonistas als lieus ils pli divers, da Vrin fin Valchava, da Basilea fin Mallorca. Cun gronda avertadad han tut las persunas permess invistas da lur mintgadi. Petra Rothmund, la redactura responsabla da la seria, è stada impressiunada: «Las persunas purtretadas ans han propi laschè prender part da lur vita, da lur

mintgadi. Ina giada ha la crew da film perfin pudì entrar la damaun en l'abitaziun durant ch'il protagonist durmiva anc. E nus udivan co el sgruflava! Quella proximitad e quella fidanza m'han propi commovì.»

Ina revue per la fin da l'onn

La seria ha procurà per buns resuns e diversas reacziuns. E perquai mussa RTR ils 30 da december anc ina giada las ivettas da quels 16 purtrets –en ina versiun da 50 minutas cun tut las persunas purtretadas: Samuel Bischof da Mustér, Ottilia Godly da Brail, Dario Cantieni da Donat, Fatima Tschenett da Wangs, Tinet Michael da Valchava, Madlaina Capeder Sonder da Salouf, Serafin Caviezel da Vrin, Eva Camenisch da Basilea, Aita Largiadèr da Sta. Maria, Werner Bühler da Savognin, Andrea Pinösch da Sent, Nicole Bundi da Mallorca, Margrit Tie-



Werner Bühler da Savognin, in dals protagonistas da la seria «4x4» dals Cuntrasts.

fenthal da Casti, Christof Loher da Trin, Emma Gabriel da Vrin e Beat Padrun da Samedan.

4x4 – la revue da tut ils 16 purtrets, ils 30-12-2018, a las 17:05 sin SRF1 ubain sin rtr.ch

Tgi vegn – tgi mida



Bernard Bearth (*1964) è returnà tar RTR. Dapi l'october ha el lavurà en la squadra Datas + Archiv (D+A) ed il december 2018 ha el surpiglià la responsabladad per la partiziun D+A.



Carlos Tgetgel (*1998) ha cumenzà l'entschatta da november 2018 sco informaticher. El vegn da Domat ed ha terminà la stad 2018 l'emprendissadi d'informatica.

Nina Defuns (*1996) ha midà il november 2018 cun in pensum parzial en la redacziun Battaporta.



Dasperas resta ella redactura Telesguard e moderatura Minisguard e terminescha la scola-zion schurnalistica al MAZ.



Paula Nay (*1985) remetta la funcziun sco producenta dal Telesguard per la fin dal 2018. A partir dal 2019 lavura ella en pensum parzial per la redacziun Cuntrasts e per l'actualitad.



Uorschla Brunold (*1987) cumenza l'entschatta da schaner 2019 sco controlladra da finanzas en pensum parzial. Ella vegn dad Ardez, ha

fatg l'emprendissadi commercial e sunter il bachelor en economia da manaschi a la HTW Cuira. Ils ultims onns ha ella lavurà en pliras funcziuns tar la Credit Suisse.



Silvia Tschuor (*1967) cumenza l'entschatta da schaner 2019 sco contabilista en pensum parzial. Ella stat a Sagogn ed ha lavurà en diversas interpresas sco emploiada commerciala. Sper la lavur da biro maina ella in rudè d'uffants a Glion.

Sara Hauschild (*1971) cumenza l'entschatta da schaner 2019 sco redactura Telesguard en pensum



parzial. Dasperas lavura ella vinavant sco redactura tar il schurnal regional da la Svizra orientala da radio SRF.



Selina Chistell (*1992) e Gion Gieri Flepp (*1991) surpiglian l'entschatta dal 2019 per in mez onn la funcziun da producent/producenta Radio Rumantsch.



Cordiala gratulaziun e buna entschatta.

«Redactur da radio è stà per mai il job da mes siemis»

Ils ultims 27 onns ha Benedetto Vigne lavurà tar il Radio Rumantsch. Durant quest temp ha el realisà dapli che 1'000 emissiuns e contribuziuns.

Il spectrum da sia lavur tanscha dal Soundcheck a las Perlas fin a las Truvaglias, e bler da quai è cult. Ed el è era stà l'emprim che ha duvrà consequentamain il rumantsch grischun per la preschentaziun e moderaziun da sias emissiuns. Benedetto ha lavurà tar RTR fin quest atun, a la fin cun in pensum parzial. Ed ussa ha el definitivamain prendì cumià da sia piazza da lavur en chasa RTR. In'ultima baterlada cun ses collega da lavur Jachen Prevost.

Benedetto, il 1991 han ins dumandà tai, sche ti avessas gust da lavurar sco redactur tar il Radio Rumantsch.

Co has ti reagì?

Jau hai fatg veritabels sigls en l'aria. Il radio era lura mes med preferì e da lavurar qua sco redactur è stà per mai il job da mes siemis.

Tge experienschas has ti fatg cun in medium nov e cun lavurar en in team bler pli giuven?

Forsa la pli impurtanta experienscha: ch'igl è da scriver in pau different per in medium discurrì che per in medium stampà – quai che jau aveva fatg fin lura. Collegas pli giuvens m'han gidà cun problems technics, han però er enritgì mia savida musicala.

Ti has vivì ils temps ed eveniments impurtants da la musica da pop e rock. Has ti temas preferids che t'han fascinà fermamain?

Il temp «fundativ» dals onns 1960 cun ils Beatles, ils Rolling Stones e Bob Dylan; la vieuta da punk e new wave enturn l'onn 1980; l'atgna scuverta da scenas «exoticas», sco per exempel il rock argentin – scu-



Benedetto Vigne (amez) ha prendì cumià da ses collegas da lavur en la redacziun da musica RTR: Jachen Prevost, Flavio Tuor, Christa Soliva e Gion Dominic Pohle (da sanestra).

vertas che han era gidà a valurisar la musica rumantscha.

Tar la redacziun da musica da RTR datti bleras differentas incumbensas. Tgenina è stada tia occupaziun preferida?

Retschertgar musica en la fonoteca e concepì cun quella in'emissiun

organica. Quasi sco da cumponer chanzuns.

Co has ti vivì il svilup che RTR ha fatg durant tut quels onns, il svilup da las medias en general, la digitalisaziun?

Jau sun in animal da la disa; magari sun jau ma dustà emoziunalmain

cunter midadas. Jau hai percurri l'entir svilup davent dal vegl tagl da bindels fisics enfin al tagl virtual al monitor. Interessanta, ma er alarmananta, chat jau la substituziun latentada dals meds classiccs «da scantschala» radio e televisiun tras meds interactivs e participativs, quai che avra tranter auter la porta er a dischinfurmaziun e denigraziun generala.

Dapi in pèr emnas es ti pensiunà. Sin tge t'allegras il pli fitg?

D'avair puspè dapli temp per scriver, leger e far musica – e durmir pli ditg la damaun!

Char Benedetto, grazia fitg per quest discurs e per tes engaschament a favur da RTR e da la musica rumantscha. Nus giavischain tut il bun per il futur e sperain d'udir anc bler da tai – en tge furma ch'i saja.

Benedetto Vigne, naschì il 1951 a Belluno en l'Italia, e creschì si a Salouf en Surmeir. Suenter il gimnasi a Mustér, è suandads studis da filosofia a Turitg. El ha lavurà blers onns sco schurnalist a Turitg e sco redactur da musica tar il Radio Rumantsch. Benedetto è stà confundatur dals Dis da litteratura a Domat ed è sper sia lavur litterara era regularmain sin tribuna sco rockadur.

Ses texts litterars – tant prosa sco

era lirica e texts da chanzuns – scriva el per gronda part en la lingua da standard rumantsch grischun. Uschia ha el per exempel realisà l'onn 2005 – ensemen cun Gioni Fry – ina cumpilaziun voluminusa da represas rumantschas dals Beatles, cun il titel «Lain fabular». El vala sco in dals pioniers e promoturs dal rock rumantsch e da la scena actuala da chantauturas e chantauturs.

La lingua rumantscha: mes paun da mintgadi

Dapi tschintg onns è la linguista Anna-Alice Dazzi responsabla per l'accompagnament linguistic da collavuraturas e collavuratur da RTR. Tge è tut sa midà durant quels onns e co vesa sia lavur quotidiana ora?

Tge respundas ti ad insatgi che pretendia ch'il rumantsch saja tes «paun da mintgadi»?

Quai è uschia. Jau discor rumantsch e m'occup mintga di cun la lingua e sias varietads.

Fin oz è tia carriera professionala sa focussada sin la lingua rumantscha. N'has ti mai gi il giavisch da far insatge auter, u dumandà auter: n'es ti mai vegnida unfisa dad adina mo t'occupar cun il rumantsch ed ils Rumantschs?

Bain, jau avess gi anc blers auters interess, sco per exempel la giurispudenza, la politica u l'hotellaria. E na, jau na sun betg anc stufia da la lingua e dal rumantsch. Lingua e communicaziun – grategiada u main grategiada – tranter nus umans, quai ma fascinescha adina puspè. Ed il pitschen mund rumantsch cun sias differentas fassetas ha en blers regards caracter da model e porscha la pussaivladad d'observar ed emprender zunt bler davart la lingua sco med da communicaziun impurtant. E cun mia lavur tar RTR hai jau la schanza da m'occupar er anc cun la lingua en las medias, in sector fitg dinamic ed innovativ che influenzescha oz pli che mai il diever ed il svilup da nossas linguas.

Sper il focus sin il rumantsch hai jau però adina puspè tschertgà autras sfidas. Perquai sun jau m'occupada en differentas cumissions cun du-

mondas da la politica linguistica chantunala e federala, damai cun tut las linguas svizras. Ed ils onns 1998-2008 hai jau lavurà – sper mias incumbensas qua en il Grischun – en il comité d'experts per la Charta da las linguas minoritaras dal Cussegl da l'Europa a Strasburg. Cun quella lavur hai jau emprendì d'enconuscher autras minoritads, hai fatg novas experientschas professionalas ed hai survegni uschia er in'otra vista sin nossa situaziun linguistica qua en Svizra.

Co è tia lavur tar RTR sa midada en il decurs dals ultims onns?

La lavur sco tala n'è betg sa midada fitg. Jau sun ina spezia da kiosk linguistic per las redacziuns e partiziuns da RTR, fatsch scolaziuns e perfecziunaments e tschertg ensemen cun noss redactors e nossas redacturas p.ex. novs plects, modas da dir e formulaziuns adattadas per noss differents vecturs radio, televisiun ed online. En discussiun e barat cun las redacziuns da Minisguard e Battaporta tschertgain nus da duvrar ina lingua adequata per noss public giuven. En pli respund jau gugent er a dumondas da noss public pertutgant la lingua ed infurmesch davart il diever da las differentas varietads linguisticas tar RTR. Dapi dus onns fatsch jau mintga mardi a las 10:15 las Linguarias al Radio Rumantsch, ina curta baterlada davart in pled u



Anna-Alice Dazzi ha er in'ureglia averta per dumondas linguisticas da Reto Pfister, il nov redactor da RTR per la Surselva.

in'expressiun actuala, speziala, interessanta u curiosa che ha fatschentà nus en las redacziuns. Il coaching, surtut da noss redactors giuvens e da nov persunal è davenità anc pli intensiv, perquai che las enconuschientschas linguisticas da quels èn per part fitg differentas. E per finir è era mia atgna vista sin la lingua e sias varietads vegnida anc pli differenziada.

Savens aud'ins la critica che la giuventetgna rumantscha na discurreia e scrivia betg (pli) bain rumantsch. Constat quai?

Quai è ina critica permanenta e fitg veglia, betg mo en la Rumantschia, ma er en autras cuminanzas linguisticas. Cler, la stretga convivenza dal rumantsch e dal tudestg ha adi-

na influenzà nossa lingua, surtut quella discurreia. Linguas èn però adina sa midadas e sa svilupadas. Nus na discurrein betg pli sco noss babuns, ed ils giuvens dad oz han in'otra lingua. Quai è normal e vala per tut las linguas. En nossa situaziun bilingua e plurilingua e tras la gronda influenza da las differentas medias – surtut era quellas socialas – stuain nus però adina puspè sensibilisar ils giuvens, ma era quels pli vegls, da duvrar in rumantsch actual, e tuttina autentic e creativ, ina lingua cun in agen caracter ed adattada a las differentas situaziuns comunicativas.

Sche la buna dila t'offriss trais giavischs en connex cun il rumantsch, tgenins fissan quai?

Lura ma giavischass jau che nus tuts e tuttas en chasa RTR dovrian la lingua sco instrument da lavur cun premura, gust e creativad, che las differentas purschidas da RTR sajan uschè attractivas ch'era blers giuvens taidlan, guardan, legian e tematiseschan quellas e che la Rumantschia saja pli curaschusa ed haja visiuns per las grondas midadas e sfidas dal futur.

LAVURATORI FAR MEDIAS

TGE È SCHURNALISSEM? CUN QUEST LAVURATORI PUDAIS VUS SEZS ESSER DURANT IN DI SCHURNALISTS DA RADIO E MULTIMEDIA.

13-04-19 E 28-09-19, 08:30 – 17:30

Annunzia sin www.rtr.ch/plazzas

RTR Radiotevisiun Svizra Rumantscha

SRG SSR

Top 5 RTR – mias emissiuns preferidas

Adrian Camartin ha 42 onns e lavora dapi il 2006 tar RTR. Dapi sis onns è el ina da las vuschs che raporta da la politica federala a Berna e da la Bassa. Dal program da RTR han plaschi bain ad el:

Èsi temp d'abolir il celibat?

Pir dapi il 12avel tschientaner dastgan ils plevons catolics betg pli maridar. Maria Victoria Haas reflectescha da diversas varts la dumonda, sch'il celibat è anc confurm al temp. Dapli sin rtr.ch en l'emissiuon Vita e creta – «Il celibat – temp per abolir el?» dals 7 d'october 2018.

Cun brass tras la notg

Durant il temp d'enviern, cura che las notgs èn pli lungas, èsi il dretg mument per tadlar in pau musica cun in tema che porscha blers differents aspects interessants. Dapli sin rtr.ch en L'instrumentala dals 14 da november 2018.

Swiss Skills – in'aventura

En la Marella direct da Berna han Livio Chistell e Gion Gieri Flepp anc ina giada laschè reviver ils pli bels muments da la concorrenza da professiuns naziunala. Tut quai a moda spontana e fitg divertenta.

Dapli sin rtr.ch en l'emissiuon La Marella – «Tgi daventa campiun u campionessa da professiuon?» dals 16 da settember 2018.

La terza minoritad grischuna

Mintgatant fai bain da guardar in zic sur l'agen taglier ora, cunzunt era sco Rumantsch. En ses discurs cun Leonie Barandun-Alig dat Astrid Alexandre ina bella invista en il patratgar dad ina Gualsra fitg engaschada.

Dapli sin rtr.ch en l'emissiuon Magazin da cultura – «Era ils Gualsers sa sentan sco minoritad en il Grischun» dals 6 d'october 2018.



In'ura, ina persuna

Jau sun in tip mirveglius. Ed il pli fitg interesseschon mai autras persunas. Danunder vegnan ellas? Tge han ellas fatg e co vesan ellas il mund? Gist quai vegn jau a savair mintg'emna en il Profil. E grazia al podcast poss jau tadlar ils purtrets dapertut, nua che jau hai gust e temp.

Dapli sin rtr.ch en l'emissiuon Profil, adina la sonda suenter las 09:00 e sco repetiziun la mesemna saira suenter las 20:00.

Pasta frulla cun tschigulatta ed oranscha

In simpel recept per il temp d'advent e da Nadal – fatg spert e gusta bain!

Ingredientas

per 12 tocs, pront en 30 minutas:

- 150 gr paintg
- 200 gr farina
- 50 gr zutger brin
- 1 oranscha
- 50 gr tschigulatta per cuschnar



Preparaziun

Prestgaurar il furnel sin 190 grads celsius. Preparar ina furma da pastizaria (20X20cm) cun palpieri da pergamina. Maschadar en ina cuppa il paintg cun la farina, il zutger e la paletscha sgrattada dad ina mesadad da l'oranscha. Truschar las ingredientas ad ina pasta (betg empastar), silsuenter smatgar la rasada da var 1 cm grossezza en la furma da pastizaria. Laschar coier 20

minutas en furnel fin che la pasta frulla è levamain brina. Prender la furma da pastizaria or da furnel, sfarinar cun zutger brin e laschar sfradentar la pasta frulla. Entant laschar luar la tschigulatta en ina padella.

Tagliar la pasta frulla èn 12 tocs, guttentar cun la tschigulatta e decorar la pasta cun il rest da la paletscha sgrattada da l'oranscha. Far giu la paletscha da l'oranscha,

tagliar l'oranscha a rudellas e servir cun té, punsch, café u vin chaud. Bun appetit giavischa

Sergio Guetg, producent moderaziun Radio Rumantsch

empastar – kneten
guttentar – beträufeln
furma da pastizaria – Backform
Pasta frulla – Mürbeteig

Impressum

editura: Radiotelevision Svizra Rumantscha, 7000 Cuir

gremi editorial: Ladina Heimgartner (lh), Erwin Ardüser (ea), Johann Clopath (jc), Tamara Deflorin (td)

gremi redacziunal: Patrick Alig (pa), Erwin Ardüser (ea), Claudia Cathomen (cc), Johann Clopath (jc), Tamara Deflorin (td), Armin Gruber (ag), Ladina Heimgartner (lh), Daniel Wasescha (dw)

per questa ediziun han era collavurà: Flurina Badel, Flavio Bundi, Sabrina Bundi, Fabia Caduff (fc), Adrian Camartin, Guadench Dazzi (gd), Flavio Deflorin, Vanessa Erni, Bertilla Giossi, Sergio Guetg, Flavio Huonder, Ursin Lechmann, Alexi Monn, Paula Nay, Casper Nicca, Jachen Prevost, Valentin Schmed (vs), David Truttmann (dt), Flavio Tuor (ft), Roger Tuor.

grafica e cumposiziun: Johann Clopath

correctorat: Lia Rumantscha

stampa: Gammeter Media

datas da publicaziun: 4 giadas l'onn (mars, zercladur, settember, december)

ediziun: 3'200 exemplars

contact:
Radiotelevision Svizra Rumantscha
Via da Masans 2, 7000 Cuir
tel. 081 255 75 75
accents@rtr.ch

Gugent resguardain nus Voss giavischs per ulteriurs abunaments, midadas d'adressa, e.u.v.

era sin: rtr.ch/accents

Ina surpraisa per Vanessa

Ils 14 d'avust 2018 sun jau vegnida surpraisa cun ina visita tut speziala. Tgi che quai è stà e co che quai è stà per mai pudais Vus leger en quest artigel.

Sco emprendista commerciala en il terz onn tar RTR n'han ins atgnamain betg pli bler da far cun la redacziun da musica. Dentant han ils producents mintg'emna ina sesida da coordinaziun, da la quala jau hai adina da scriver in protocol. Flavio Tuor, producent da musica, aveva menziunà che RTR survegnia quel di visita d'in star da schlagher plitost giuven. Jau na sun atgnamain insumma naging fan da schlagher – cun excepziun da la parada da schlaghers che ha lieu mintg'onn a Cuira – ma tuttina hai jau già mirveglias tgi che vegn sin visita tar nus. Il mument che Flavio ha ditg ch'il num dal chantadur saja Vincent Gross, hai jau stuì tradir ad el che jau saja in pitschen fan da Vincent. Il giuven da 22 onns è oriundamain da Basilea, ses geniturs da la Germania dal Nord. Cun ses segund album «Möwengold» ha el fatg ina



Durant la visita al Radio Rumantsch ha il chantadur da schlaghers Vincent Gross fatg ina surpraisa musicala a l'emprendista Vanessa Erni.

turnea da radios, tranter auter era tar il Radio Rumantsch. Ma pertge enconusch jau insumma Vincent? Jau hai emprendì d'enconuscher el tras social media e lura sun jau era stada ad in concert dad el a la parada da schlaghers.

In simpel mardi suentermezdi

Dario Müller, redactor da la Televisiun Rumantscha, vegn en mes biro e m'infurmescha ch'el filmschia mai durant lavorar. Duas minutas pli tard aud jau ils tuns d'ina

ghitarra, jau ma volv cun in surrir en fatscha, e là stat el: Vincent Gross chanta per mai sia chanzun «Mein Lied für dich» – ina chanzun d'amur. Jau na sai betg propi nua che jau duess guardar. En quest mument sun jau surdumandada e vegn tut cotschna. Suenter quest pitschen «concert privat» poss jau anc dar ina baterlada e far ina foto cun el. Vincent ma regala lura anc in DC cun autogram.

La surpraisa è stada gronda, e l'inscunter cun il star da la scena da schlagher vegn segir a restar en memoria a mai sco in highlight da mes emprendissadi tar RTR.

Vanessa Erni,
emprendista commerciala

Il video tar questa istorgia pudais Vus guardar sin rtr.ch/cultura.

Cordiala gratulaziun

Flurina Badel e Jérémie Sarbach survegnan il «Manor-Kulturpreis Wallis» 2019.




(rtr) Flurina Badel, redactura dals Impuls da RTR, e Jérémie Sarbach sa distinguan tras lavurs experimentals en connex cun il svilup da la cuntrada muntagnarda en il temp da la

globalisaziun e da la saturaziun da las novas tecnologias. Cun far diever dals pli differents mediums (video, installaziun, performance, disegni e scrittira) mettan els en dumonda las colliaziuns da la societad da consum e da l'avegnir da las resursas natirals en las regiuns perifericas. Ils dus artists èn activs a Guarda, en il Girschun ed en il Vallais. La finamira dal premi, ch'è vegnì surdà per l'emprima giada il 1982, è da promover artists talentads, dentant anc main enconuschents. L'atun 2019 vegn deitgada als dus premiads ina exposiziun en il Museum d'art dal Vallais.

En l'aria e davent cun RTR

(rtr) Tgi che sgola cun la SWISS po dapi il mars 2017 era guardar films realisads da RTR. Actualmain è quai il film «Anna Lee Famos – Ina Engiadinaisa a Londra». Sin in sgol cun la SWISS è Petra Rothmund, l'autura dal film (foto) dacurt puspè s'inscuntrada cun la protagonista Anna Famos da Martina che viva dapi il 1960 a Londra.

Ils films da RTR restan per 6 mais en il program da la societad aviatica e vegnan lura remplazzads. Actualmain pon passagiers da la SWISS era guardar in segund film rumantsch, numnadamain «Amur senza fin», l'emprim film dramatic rumantsch che ha già sia premiera la stad passada a chaschun dal Festival da film a Locarno. Bun sgol e bun divertiment.



nossaistorgia.ch va sin turnea

Suenter in onn èn da chattar sin nossaistorgia.ch prest 2'500 fotografias, films e documents da tut gener.

La plattafurma digitala nossaistorgia.ch ha festivà il november 2018 ses emprim anniversari. Per preschentar l'offerta è vegnida fatga ina pitschna turnea tras il

Grischun e fin giu Turitg. L'interess è stà fitg grond, e l'arcun cun documents, fotografias e films s'emplaina di per di.

Sin turnea

La communitad mundiala ha YouTube, la communitad rumantscha e grischuna nossaistorgia.ch. Donn è sulettamain che la plattafurma, sco pop da pir in onn, n'è anc betg enconuscenta a l'entira populaziun dal Grischun. Tge far? nossaistorgia.ch ha fatg ina pitschna turnea ed è sa preschentada al public interessà a Casti ed a Mulegns, cun in stan d'infurmaziun a l'EBexpo a Scuol e lura durant l'emprim di da scola a Zernez. L'entschatta da settember ha nossaistorgia.ch dà suatientscha a l'invit da l'URB, l'Uniun da las Rumantschas e dals Rumantscha en la Bassa, ed è sa fermada ad Oerlikon/Turitg. La naiv prematura la fin d'october ha mess blera glied avant la dumonda: star sin pigna u visitar l'EX18 Mu-

stér? La finala han tuttina blers e bleras visità il stan da RTR e la preschentaziun da nossaistorgia.ch. Bleras regurdientschas èn vegnidas activadas e las discussiuns davart «tempi passati» èn stadas animadas, e tut quai grazia a l'arcun da nossaistorgia.ch.

nossaistorgia.ch vegn era tar Vus!

Er il 2019 vegn nossaistorgia.ch puspè a sa metter sin viadi. Nus visitain instituziuns, archivs, chasas d'attempads, clubs, uniuns e societads. Vulais era Vus che nus vegnin tar Vus? Scrivai in e-mail a nossaistorgia@rtr.ch

Flavio Huonder,
curatur da la pagina
nossaistorgia.ch



[nossaistorgia](http://nossaistorgia.ch) sin visita en l'Hotel Liun a Mulegns.

L'istorgia dal jazz en il Grischun

(ft) En Svizra datti il jazz gia dapi il cumenzament dal 20avel tschientaner. Lura sa concentra-va quel però sin las citads pli grondas. En il Grischun ha il jazz gi pli grev da s'establi. Ils emprims fastizs chattain nus en ils hotels cun ses giasts internaziunals. Suenter la Segunda Guerra mundiala è l'access a quella sparta da musica daventà pli simpel. Cun las emissiuns da radio arriva il jazz tar in public pli vast, ed a partir dals onns 1940 e 1950 cumenzan er en il Grischun amatur a far musica da jazz. Surtut a Cuira sa sviluppa ina pitschna scena cun bands sco ils Praxim Stompers, ils New Orleans Hot Tigers, ubain la Planaterra Street Gang. Tar diversas da quellas è era Fritz Trippel-

pel stà da la partida, in dals pioniers dal jazz en il Grischun. A partir dals onns 1980 sa midan ils stils ed er ils musicists. Il jazz daventa pli modern ed ils artists èn adina pli scolads. Uss exista ina scena fitg viva, ed era las Rumantschas ed ils Rumantschs han scuvert lur passiuun per il jazz: Clamür, Standards of rumantsch, Schnozgroup, (C'est si) B.O.N., Lucas Schwarz, Clau ed Andriu Maissen, Rees Coray, Martina Berther, Valeria Zangger e Rolf Caflisch, il fundatur da Weekly Jazz.

L'istorgia dal jazz en il Grischun cun ils chaus vitiers, e co ch'el vegn vivì oz, chattais Vus sin rtr.ch/musica.

PERSUNALITADS DAL JAZZ GRISCHUN

- Fritz Trippel
- Werner Lüdi
- Andi Schnoz
- Luca Sisera
- Rolf Caflisch
- Standards of Rumantsch
- Mario Haltiner
- Curdin Janett
- David Maeder
- Markus Schmidt
- Nicuin Janett
- Clamür
- Clau Maissen
- Lucas Schwarz
- Christian Müller
- Andriu Maissen
- Martina Berther
- Claudio Bergamin
- Valeria Zangger

Quai spetga Vus (e nus) il 2019

Il pled «spetgar» ha pliras significaziuns. «Spetgar» sin insatge u sin insatge, spetgar ch'insatge capita, «esser da l'opiniun ch'insatge è probabel» però era «spetgar insatge». La noziun «spetgar» exprima insatge durabel ed il medem mument insatge exigent. Spetgar cun pla-schair anticipà, per uschè dir.

Metter ensemen in program – al-main la part ch'ins po spetgar – per in public interessà, critic ed eterogen è interessant ed a medem temp ina sfida. Infurmaziun, cultura, sport, divertiment – er il 2019 As spetga in potpurri da differentas accziuns e projects.

Er il 2019 As vulain nus animar da

pensar, nus As vulain infurmar e divertir. Mintgatant As stuain nus forsa era provocar – er emoziunal-main – però adina a moda equilibra-da e natirala. Nus na vulain betg mo rapportar, mabain er ordinar e moderar differentas tenutas.

Nus vulain esser qua per Vus. Vus duais pudair As laschar sin nus. E

Vossas spetgas envers nus duain esser grondas. Nus faschain tut il pussaivel per las ademplir.

As annunziai nunschenadain, sche Vus avessas «spetgà» dapli.

Flavio Bundi, schefredactor

Missiun B – Per dapli biodiversitad
In project surregional da la SRG-SSR – dapli a partir da primavaira ...

Plirs livestreams ...
sport, cultura, discussiuns da podi

Sviluppar emprims podcasts
Natrilmain en rumantsch!

Turnea da festivals 2019
Frestg, frech e simpatic.

Elecziuns naziunalas
Rapports constructivs e curtegn didactic – render palpabel la politica.

www.rtr.ch
In nov design da la website.

Il radio survegn in facelifting
A partir dal schaner 2019 surlavurain nus cuntinuadain il raster da radio.

Dapli canortas
Nus vulain esser anc pli datiers da noss public ed integrar anc pli fitg sias experientschas en noss program.

«Samy selvadi» – e sia premiera a Donat

Adina dapli glied vegn dad isch en. Jau ses en l'emprima retscha, gnervus, spanegià co ch'il public reagescha sin «Samy selvadi» – il film documentar davart Samuel Cantieni.

Samy sesa gist davos mai, fatschentà cun ses pop, Loui Jonspinas, dal qual ni el ni jau savevan novas avant in onn, cura che nus avain cumenzà cun las filmadas. Avant ch'igl è dentant stà pussaivel da mussar il film, hai jau preschentà l'idea als responsabels da RTR.

Settember 2017, seduta en chasa RTR

Jau stun en l'ala dad ina vart dal corpus alv, da l'autra vart David Truttmann, il producent dals Cuntrasts. «Jau vulesch far in film davart Samuel Cantieni» di jau. «Ti manegias Samy? Quel che jau enconusch da la scola chantunala e che ha lura chalà curt avant far la matura? Pertge in film cun Samuel?» Jau argumentesch quant interessant che Samy è, co

ch'el viva ina vita tut singulara, co ch'el è liber, ch'el fetschia lavurs tut unicas ... ed a la fin: «Bun, ok, faschainsa», di David.

Donat, ils emprims tuns dal film. Il maletg dal desert sin la taila gronda. Samy sin il töff, Samy en l'auto, Samy a pe tras in vitg marocan, Samy sin il skateboard ... e Samy a Donat en sala che cloma tranteren: «Quella scena cun me segl skateboard vessti savieu schar davent!»

Schaner 2018, eroport da Marrakesh

Avant la controlla da bagascha ch'i dovra per entrar en in pajais. Davant mai ina crew da televisiun en grondas discussiuns cun il personal da duana. Jau hai gia uss in nausch sentiment. E lura va mia valisch tras il scanner.

Jau: «Bonjour, ça va?»

Duanier: «Qu'est que c'est ça?» Jau: «Une camera.»

El:


«Ça n'vas pas. Cette camera est trop grande. Il faut avoir un permis.» La discussiun va vi e na. A la fin poss jau entrar en il pajais, ma senza camera. Tge far? Samy ha la soluziun: sia camera da fotografar, mes microfon, in stop tar in serrer e nus avain er ina sort stativ. Tut improvisà, ma i funcziuna.

Donat. Undas da la mar, ils davos tuns dal film. Applaus. Plaschair. La glied ha reagì sin il film. Quai è adina la tema: che nagin na ria, che nagin na 'giaja cun' cun il film. Ma qua, a chasa, nua ch'il public enconuscha Samuel, qua para il film d'avair chattà il public. Cun ir sin tribuna cun Samy per il discurs cun Anna Se-

rarda Campell, la moderatura da la saira, dumond jau: «E lura?» Samuel: «Bagn bagn. Bi. Sund cuntaint. Gratzga fetg», e Samy ri. Jau era.

Casper Nicca, redactor Cuntrasts

Il 1. da november en la halla polivalenta a Donat: Anna-Serrarda Campell, la moderatura da la saira, en discurs cun Casper Nicca, autur dal film, (a sanestra) e l'actur principal Samuel «Samy» Cantieni.





Dapertut è l'interess dal public stà grond: la fin da schaner ha la turnea da lecturas «Sin il viv!» cumenzà en garascha a Sedrun.

Ils Impuls sin turnea han tutgà «Sin il viv!»

Per festivar il 25avel anniversari da l'emissiun ha RTR envidà a la turnea «Sin il viv!». Set giadas èn impuls vegnids prelegids «live» là, nua che l'emissiun vegn uschiglio era tadlada.

Per dir grazia al public per l'interess dapi onns, èn ils Impuls sa mess quest onn sin viadi tras il Grischun e fin a Turitg. Els èn sa preschentads en ils lieus dal mintgadi da las auditturas e dals auditurs – en stiva, stalla e lavuratori, or en iert ed en il salun da coiffeur. E la turnea ha chattà buna accoglientscha.

La finamira n'è betg stada quella d'avair il pli bler public pussaivel, ma d'offrir prelecziuns d'auta qualidad en in rom famigliar e cordial, e per il pli en lieus privats e perquai era particulars. E para che precis quai ha tutgà il gust dal public. Cun radund 350 visitadras e visitaders èn las set prelecziuns da la turnea «Sin il viv!» stadas visitadas propi fitg bain, gea en tscherts lieus n'avessi gnanc gi dapli piazza. Uschia era tar l'ultima prelecziun che ha gi lieu il cumenzament da november en in salun da coiffeur, e quai a chaschun dals 28avels Dis da Litteratura a Domat. Il salun Haaratelier è stà

emplenì fin a l'ultim plaz: 60 persunas èn vegnidas per tadlar las perlas litteraras da Carlo Beer, Sidonia Pazeller e Jessica Zuan, ils pli «novs» auturs dals Impuls. Medemamain da la partida è stada Myriam Pelican che scriva impuls en rumantsch da Domat, e quai dapi il 2011. Questa ultima ediziun da la turnea è stada deditgada ad auturas ed ad auturs betg anc enconuschents e giuvens che fan lur emprims pass litterars publics scrivend impuls.

Cun auturas ed auturs da pliras generaziuns

La scena da la litteratura rumantscha è oz viva e vasta sco forsa anc mai, e quai segir era grazia als Impuls. L'emissiun fa d'ina vart bain part dapi in quart tschientaner dal mintgadi da las auditturas e dals auditurs dal Radio Rumantsch, ma ella, ch'è oriundamain stada definida «sulettamain» sco in patratg per cumenzar il di, è cun ils onns daven-

tada ina plattform da promoziun impurtanta per la litteratura e lectura rumantscha. Las redacturas responsablas per ils Impuls, fin il 2016 è quai stada Rita Uffer, e dapi lura Flurina Badel, han pia er ina funcziun da tschertgatalents e da coach. A scripturas ed a scripturs pli etablids dat l'emissiun la pussaivladad da publitar cuntinuadamain. Uschia per exempel a Dumenic Andry che scriva impuls gia dapi l'onn 2005, e che ha perfin publità il cudesch «Uondas» (2008, editionmevinapuorger) cun ina tscherna da ses texts scrits per ils Impuls. Dumenic Andry ha prelegì il cumenzament d'october, cura che la turnea è sa fermada en la stiva da la famiglia Ganzoni a Schlarigna, quai ensemen cun Bettina Secchi, Sara Francesca Hermann e Martin Cantieni.

In'atmosfera empernaivla e particulara

Sco ina festa da famiglia gigantesca

è stada la tschintgavla prelecziun la fin d'avust, cura che «Sin il viv!» è sa fermà sin il bain puril «La Muota» da la famiglia Casanova a Lumbrein. Ina fulla da passa 90 persunas è vegnida per tadlar Carin Caduff, Asa S. Hendry e Myriam Pelican, las trais auturas da la regiun, e l'autur engiadinais Arnold Rauch. Sco en tut ils lieus da la turnea ha mintga autura e mintga autur prelegì era qua quatter impuls, per part scrits aposta per il lieu da l'occurrenza. Aposta per la prelecziun en l'iert da la Chasa Torel a Guarda, han era las duas scripturas valladras Rut Plouda e Fadrina Hofmann, il scriptur jauer Plinio Meyer ed il scriptur sursilvan Arnold Spescha scrit impuls. Uschia ha Plinio Meyer legì la poesia tragicumoristica «Zarclin» che raquintada Uorschla e da ses um che fiss pli gugent in giabus en l'iert dad Uorschla. Tranter la lectura han las auturas ed ils auturs era raquintà tar mintga prelecziun da «Sin il viv!» da



Ina fulla da passa 90 personas è vegnida per tadlar las prelecziuns en la stalla dal bain puril a Lumbrin.

lur process da scriver, dal respect dal palpigi alv, da l'impurtanza che impuls han en lur atgna vita u da lur strategias differentas per decider sur da tge scriver. Uschia era tar il terz lieu da «Sin il viv!» la fin da zercladur, cura che la turnea è sa fermada cun Rina Steier, Dominique Dosch, Zegna Pittet-Dosch e Göri Klainguti en la halla da construcziun imposanta da la lainaria Uffer SA a Savognin.

Cun texts baud leghers e critics, baud trists e misterius

Per festivar il giubileum da 25 onns da l'emissiu Impuls era cun las Rumantschas ed ils Rumantschs che vivan giu la Bassa, ha gi lieu la segunda lectura da «Sin il viv!» il favrer a Turitg. Il public ha chattà la via tras il labirint da l'agentura da comunicaziun e design GEYST per tadlar ils Impuls legids «live» da

Benedetto Vigne, Chatrina Josty, Romana Ganzoni e Carlo Beer. Era diversas auturas e divers auturs dals Impuls che abitan giu la Bassa, sco il scriptur Benedetto Vigne, che viva gia dapi 40 onns en la citad da Turitg. El è in dals «impulsists babuns» prezios e contribuescha gia dapi l'onn 1998 a l'emissiu, quai savens era cun texts che tematiseschan il mund urban, ma era la brama per las muntognas. Diverti u

fatg siemiari han er ils impuls ch'ils dus auturs Leo Tuor e Jürg Gautschi e las duas auturas Gianna Olinda Cadonau e Susi Rothmund han legi durant l'emprima prelecziun da la turnea la fin da schaner en la Garscha Oberalp a Sedrun. Gia tar quella prelecziun è ina tschuncantina personas vegnida per seser da cumpagnia e tadlar ils Impuls en la scenaria extraordinaria d'ina ufficina. Tenor l'applaus ed ils buns resuns para il public d'avair giudi ils 112 impuls ch'èn vegnids prelegids durant l'entira turnea: texts che evocheschan scuffels u fan avair las larmas orasum, impuls pensivs da s'introvvertir u impuls che sbrinzlan ed animeschan da discuter a tut pudair. Il grond interess dal public animescha en mintga cas da cuntinuar en l'avegnir en ina furma u l'autra cun prelecziuns d'Impuls «live».

Flurina Badel, redactura da l'emissiu Impuls e manadra dal project «Sin il viv!»

Dapli da la turnea sin rtr.ch/cultura/sin-il-viv-25-onns-impuls



A Schlarigna ha il project «Sin il viv!» fatg staziun en la stiva da la famiglia Ganzoni.



Al puls dal Grischun: cun sia offerta tgira e promova RTR er il contact direct cun ses public – al radio, en la televisiun ed online, live sin il lieu, però era sin noss chanals da social media.



Rezia cantat: la 26avla festa da chant ha gi lieu dador il cunfin dal Grischun, a C... rapportà ed infurmà da la festa.



RTR ed ils festivals grischuns: cun ina simpla e simpatica rulotta sco lieu d'inscunter è RTR stà preschent da l'Openair Arcas fin a l'Openair Lumnezia, da Cassaccia fin a Sedrun.

Cun RTR al pul #perVus &

Era quai ha muventà



Cun emissiuns da livestream rapporta RTR en directa cun tun e maletg d'occurenzas da cultura, politica e sport. Uchia era dal final da la cuppa grischuna da ballape da las dunnas.




Anc strusch stà sin ils skis da passlung, ma ir a la partenza dal 50avel Maraton da skis engiadinais. Il reporter da RTR ha accumpagnà il noviz Serafin Beer (a dretga).



L'onn da la sitgira è stà in... tut era per l'agricultura g... tà ed infurmà dal fenome... betg sulettain fatsche



Cun RTR al puls dals megliers emprendists da la pli gronda show en il mund da professiuns: ils SwissSkills a Berna.



L'affera da cartel ha muv... rapportar, infurmar, valit... a moda equilibrada e fair



Chiavenna (Italia) – natiralmain ch'era RTR è stà da la partida ed ha registrà,



Discussiun al podium cun ils candidats: il zercladur è vegnida elegida la regenza ed il Cussegl grond dal Grischun. RTR ha infurmà ed analisà.

ls dal Grischun & #cunVus à RTR durant il 2018



na gronda sfida, oravant
grischuna. RTR ha rappor-
n meteorologic che n'ha
ntà ils purs.



Expediziun Grischun: scuvrir las istorgias en lieus
dal Grischun tudestg e talian dals quals RTR na
rapporta (quasi) mai – quai è stada la finamira da
nossa acciun da stad.



Cun la gruppungia è RTR stà en il vair senn dal pled «al puls da la chatscha».



entà! Noss'incumbensa:
car e metter a lieu. E quai
a.




Infurmar davart las fatschentas ch'èn stadas en
votaziun: er il 2018 ha RTR preschentà ils fatgs e
laschè vegnir a pled ils aderents ed ils adversaris.



Balla baterlada: Co ha plaschi il campinadi mundial da ballape en
Russia? Tge e tgi ha fascinà e tge betg? La Canorta da RTR durant il
campinadi mundial – il lieu per il barat direct cun noss public.

Rumantsch, what else? Amis per adina!

L'october han Sabrina Bundi, Flavio Deflorin e Paula Nay, reporters da RTR, fatg in viadi tras la Svizra: da Son Gagl sur Turitg a Locarno e Losanna fin a Berna. Quai cun la finamira che la Svizra daventia pli rumantscha e che la Rumantschia survegnia daplì amis en las autras regiuns linguisticas. Ma co far per cuntanscher quai?



Noss team ha survegnì quasi ina carte blanche. «Faschai attents a RTR, a moda cumpetenta e simpatica.» Mo co far quai? Nus avain già bieras ideas: sa patrunar da trens/radios/gasettas, festivar ina party inclusiv tattoo rumantsch, far star Renzo Blumenthal blut sin ina piazza per mussar in Rumantsch entir ed entratg. La finala avain nus tschernì las acziuns che parevan a nus las pli attractivas e realisablas. Tut sut il motto «Rumantsch, what else?»



Nossa finamira n'è betg mo stada da far attent al rumantsch, mabain era da chattar novas amias ed amis per la Rumantschia. E co va quai meglier che cun reparter bratschlets d'amicizia. Nus avain contactà var 15 scolas rumantschas e dumandà las scolaras ed ils scolars da producir quests bratschlets per nus. Tut las 15 scolas èn immediat stadas prontas. L'entschatta d'october avain nus survegnì mintga di pachets da l'entir territori rumantsch. Bratschlets da tuttas colors fatgs cun gronda premura, inclusiv in messadi dals scolars sco per exempel «Quist bratschlet duai purtar furtuna» ubain «Amis per adina». Grazia fitg!



Suenter avair pachetà tut il material e l'infra-structura tecnica per pudair producir per radio, televisiun ed online avain nus cumenzà ils 7 d'october nossa tura tras la Svizra. Ella ha manà nus e noss bus durant tschintg dis en tut las regiuns linguisticas da noss pajais. Tge, ed en spezial tgi che spetga sin nus na savevan nus betg, ma precis quai è stada ina da las sfidas e provocaziuns dal project «Rumantsch, what else?» per chattar novas amias e novs amis per la lingua rumantscha.



L'emprim di avain nus clamà ora per rumantsch las acziuns en ina stizun a Son Gagl. Il medem di avain nus conquistà – senza che la moderatura sappia insatge – il studio da radio da SRF3 a Turitg. La segunda fermada: Lucerna. «Yes, I know Rumantsch, it's the 4th language of Switzerland» – quai n'avessan nus mai spetgà d'udir d'in turist da la Brasilia. A la Kappelbrücke avain nus fatg il «fotobomben» turists e confruntà els uschia cun il rumantsch. Nus avain persvadi els da derasar la fotografia cun noss bel placat e da nudar ella cun #Rumantsch en lur chanals da social media. Uschia è noss messadi rumantsch vegnì derasà digitalmain enturn l'entir globus, da la Brasilia enfin la Tailanda.



Lia, Nesa e Donat. Quai fissan stads numms rumantschs che avessan plaschi a dunnas en speranza che nus avain entupà a Losanna. La finamira da noss stop è stada quella da surmanar in dad ellas da dar in num rumantsch al pop ubain a la poppa. Quai è senza dubi stada nossa istorgia cun il pli grond effect da «jöö» da l'entira emna. Ed il meglier: forsa è en il fratemp schizunt naschida ina «Lia», pertge ch'ina da las dunnas che nus avain inscuntrà simpatisava schont in zic cun quest patratg.



Il final da la tura è stà a Berna. Nus essan stads preschents cun la Microlotta sin la piazza da la staziun. Là avain nus organisà concerts rumantschs, repartì noss bratschlets ed animà las personas da leger per l'emprima giada in text rumantsch, numnadamain ils messadis che las scolaras ed ils scolars avevan pendì vi dals bratschlets. Bieras personas han era prendì la peda da far in bratschlet che nus pudain trametter enavos a las scolas. Anc emnas suenter noss'acziun avain nus obtegnì pachets da personas che han survegnì quel di in bratschlet e che han era fatg bratschlets per la Rumantschia.

Da l'archiv en l'internet – il Grischun en film, maletg e tun

Nua pon ins guardar films istorics e tadlar documents auditivs vegls? Tgi collecziunescha fotografias veglias e material grafic vegl?

(cp) Questas e dumondas sumegliantas vegnan fatgas savens. Perquai han RTR, la Biblioteca chantunala dal Grischun e l'Archiv chantunala dal Grischun nizzegià il Di mundial dal patrimoni audiovisual dals 27 d'october per mussar tge ch'els collecziuneschan e rendan accessibel sin lur plattafurmas online ed en lur bancas da datas d'archiv. A las staziuns d'internet en la Biblioteca chantunala a Cuira èn vegnidadas preschentadas las puschidas RTR.ch/archiv, nossaistorgia.ch, portal da medias audiovisualas dal Grischun e la banca da datas da l'archiv chantunala. Entant che l'archiv chantunala sa focusse-

scha sin mantegnair ed archivar material istoric avra RTR pass per pass ses archiv ed ha lantschà cun nossaistorgia.ch ina plattafurma online participativa, a la quala pon sa participar activamain era persunas privatas. Ina via intermediara ha tschernì la biblioteca chantunala: ultra d'archivar e da mantegnair l'agen material metta ella a disposiziun cun il portal da medias audiovisualas documents da film e da tun che han in connex cun il chantun Grischun. Quel cuntegna supplementarmain era contribuiziuns da differents archivs, da diversas bibliotecas e da collecziuns privatas e dat access a quellas.



Durant il Di mundial dal patrimoni audiovisual 2018 han (da sanestra) Christian Brassel, biblioteca chantunala; Brigitte Aregger, archiv chantunala; Alexi Monn, responsabel D+A RTR e la manadra da discussiun Diana Jörg Spescha (RTR) tematisà ils aspects dal mantegniment, da la digitalisaziun e publicaziun da medias audiovisualas.

Bun WEF u nausch WEF?

Il WEF è in punct fix en il program da RTR. Er il 2019 rapportain nus il schaner da l'inscunter dals pli auts chaus da l'economia e da la politica.

(fc) Per ils ins èsi fascinant ch'ins po ir a guardar davos ils mirs da segirezza, nua ch'ins inscuntra persunas ch'èn uschiglio mo da vesair en la televisiun. Persunas sco il president american Donald Trump, il chantadur englais Elton John u Bill Gates, l'impressari che vegn stimà sco segund ritg um dal mund. Dad auters datti però egliadas e remartgas criticas, sch'ins particepscha ad in eveniment, nua che – uschia critica ch'ins auda savens – pussanza e corrupziun han stagiun auta e nua ch'ils chaus ils pli ritgs e pussants s'inscuntran e decidian sur dal rest dal mund.

Ni bun, ni nausch

Nua uschiglio avessan nossas cusseglieras federalas e noss cussegliers federals l'ocasiun d'inscuntrar en curt temp tant da lur pèr?

Quants kilometers e quantas uras avess per exempel Ueli Maurer da sgular per inscuntrar tut ils auters ministers da finanzas? Da l'autra vart creschan ils custs dal WEF dad onn ad onn. Il 2019 s'augmenta il plafonament dals custs da segirtad dad 8 sin 9 milliuns francs. E sch'ins quinta anc vitiers la prestaziun da l'armada, munta il budget total dal WEF a 45 milliuns francs.

Fatg è ch'il WEF ha lieu mintg'on tar nus en il Grischun ed influenzescha nossa regiun. Raschun avunda per RTR dad esser da la partida e da rapportar da quai che capita davos ils mirs da segirezza. E gia ch'ils politichers e las persunas da l'economia da tut il mund vegnan ensemen, èsi segir meglier da guardar sin la detta ad els – e quai faschain nus dals 22 fin ils 25 da schaner 2019 per Vus.

La concorrenza



Tge film da RTR pon ins guardar actualmain en ils aviuns da la SWISS?

- Anna Lee Famos – Ina Engiadinaisa a Londra
- Samy Selvadi – Samuel Cantieni e sia libertad
- Per gripa e crappa – l'istorgia d'in aventurier

Premi:

Accompagnar durant in di il moderatur dal Radio Rumantsch Ivo Orlik.

Tramettai Vossa risposta fin ils 15 da schaner 2019 ad:

accents@rtr.ch ubain a
RTR Accents
Via da Masans 2
7000 Cuira

La victura da la davosa concorrenza:

Annamaria Albrecht, Danis



Pervia dal rumantsch fin en China

Per realisar in film davart il Dicziunari Rumantsch Grischun ha ina redactura da RTR fatg in viadi da quasi 18'000 kilometers.

Fin oz existivan ils actualmain 13 toms (dad A fin Michael) dal Dicziunari Rumantsch Grischun (DRG) sulettamain en furma stampada. Ussa datti quels dentant er online. Per digitalisar ils texts èsi l'emprim però stà necessari da scriver giu els. Quella lavur han datatipistas a Nanjing en la China da l'Ost fatg. Il schaner 2016 ha Ursin Lutz, redactur dal DRG, visità l'agenzia specialisada per talas lavurs – e la Televisiun Rumantscha ha accumulà el.



Er en il biro stgaurà lavuran las datatipistas cun giacca e mantè.

Scriver sco maschinas

Nus essan arrivads a Nanjing in di da fradaglias. L'emprim che nus avain emprendi: mantel e chapitscha dovr'ins l'entir di, pertge che betg tut las ustarias e butias èn stgauradas. Quai ha era fatg quitads ad Ursin Lutz: Tge, sche las datatipistas lavuran en ina stanza betg stgaurada? Sco segund avain nus percurschè che cun englais na vegn

ins betg lunsch, e perquai essan nus stads zunt leds da l'agid da Pascal Nufer, il correspondent da SRF en China. Cumenzà a filmar avain nus cun il punct culminant dal viadi, la visita en il biro da las datatipistas. Il local sa chatta en in sgrattatschiel in pau a l'ur da la citad dad 8,3 milliuns abitants. Nus essan impressuinads:

set datatipistas che scrivan sco maschinas, mintgina sesa davant dus monitors. Las spertas fan 300 fridas e dapli per minuta. Ursin Lutz è fascinà, e la manadra dal biro Qiaoyun Tao cuntenta da pudair schliar cun el problems e dumondas pertutgant segns speziels en ils texts rumantschs.

Televisiun cun giacca

Il proxim di avain nus visità la datatipista Xinhua Ge. Ella, ses um e la feglia da 10 onns vivan en in'abitaziun da trais stanzas ed ina pitschna cuschina. Cura che nus arrivain è la feglia en stiva, guarda televisiun cun en sia giacca. Nagut da nov per nus. Nus avain numnadamain emprendi ch'i dat en China in «cunfin da stgaurar». Las regiuns en il nord dal flum Yangtze han in stgaurament central, quellas en il sid betg. Questa regla ha la regenza chinaisa fixà il 1950. Nanjing è en il sid, e pia na datti là uffizialmain naginas pignas. Ils quitads che Ursin Lutz

Pertge che l'Institut dal DRG è i fin en China per laschar scriver giu ses texts, pertge ch'il project da digitalisaziun ha durà quasi trais onns, e dapli davart il project dal Dicziunari Rumantsch Grischun ch'è uss er accessibel en la rait è da vesair en il film «Made in China – la digitalisaziun dal Dicziunari Rumantsch Grischun» che vegn mussà ils 9 da december 2018, a las 17:25, en ils Cuntrasts da la Televisiun Rumantscha sin SRF1.



Ursin Lutz, redactur dal DRG, en discurs cun Qiaoyun Tao, la manadra da l'agenzia che ha scrit giu ils texts rumantschs.

ha fatg l'emprim di n'èn dentant betg stads giustifitgads: era sche las bleras datatipistas sesan davant il computer cun ina grossa giacca u cun in mantè, il biro è bain stgaurà. Ed uschia pudain Ursin Lutz e nus tuts che duvrain en il futur il DRG online far quai senza avoir nauscha conscienza.

Bertilla Giossi,
redactura Cuntrasts



Nua ch'ellas sa ferman, attiran ellas l'attenziun: L'original da RTR (a sanestra) e la nova «Microlotta» da RSI.

La sora da nossa Microlotta

Dapi il 2016 è RTR da viadi cun sia Microlotta. Ussa han er ils collegas da la Svizra taliana in sumegliant auto da promoziun. RTR ha discurrì cun Barbara Guggiari, responsabla dal team d'event da RSI.

Co es ti vegnida sin l'idea d'organisar ina «Microlotta» per RSI?

Jau sun vegnida inspirada dal vehichel da RTR! Era vus avais accentuà il stil da vintage modern e ditg: «vintage is cool!» Il vehichel attira l'egliada e l'attenziun ed è simpatic. Quai è in effect essenzial per furmar relaziuns cun noss public.

Cun tge è l'auto equipà?

Noss vehichel ha l'annada 1969. El è pia quasi in mez tschientaner vegl, ed ha nov onns dapli che la «Microlotta» da RTR. El è equipà cun moniturs da televisiun, iPads, indrizz audio, PCs, connexiun d'internet, tecnica digitala terrestre, ed insumma cun tut quai ch'i dovra per sa transformar en ina vitrina mobila che preschenta l'offerta dal servetsch public svizzer. El permetta schizunt da mussar als interessads ils emetturs da televisiun da la SRG SSR, da sa colliar cun las raits da radio – en spezial cun l'offerta multimediala da RSI – dals dus emetturs da televisiun LA 1 e LA 2, ils trais emetturs da radio (Rete Uno, Rete Due e Rete Tre) fin a la pagina rsi.ch e nossa app. Il vegl bus da VW cotschen ed alv ha survegnì ina cumparsa talmain particulara ch'el

dat en egl dapertut nua ch'el passa sperasvi. Pelvair, la glieud sa volva per guardar el, cura ch'el sa ferma a l'ampia u «fila» sperasvi. Filar è forsa in pau surfatg, pertge pervia da sia vegliadetgna è il bus en realitad plitost plaun e grev da manischar. Per quest motiv, e pervia da las emisiuns da CO2 betg confurmas a quelas d'in vehichel dad oz, tschertgain nus soluziuns pli ecologicas e persistentas, almain lura cura che nus faschain viadis pli lungs.

Nua è il bus gia stà?

Dapi ch'el è efectivamain en funcziun, pia dapi il matg passà, suenter il «restyling» mecanic e tecnic ch'el ha stuì supportar, è noss stan mobil gia stà en ils centers principals da la Svizra taliana: a Locarno, Lugano, Mendrisio, Bellinzona ed a Poschiavo – nua che RSI vegn dal reminent adina beneventà ordvart cordialmain. Nus al avain duvrà per promover las pli differentas occurrenzas. Ses debut ha el dà gist avant il campinadi mundial da ballape, nua ch'era nossa equipa naziunala è stada preschenta. Nus avain duvrà il bus per far pli enconuscha l'app da sport en Svizra taliana. Fitg impurtanta è era la collavuraziun cun

las personalitads, las fatschas enconuschantas dal program. Quellas accumpognan nossas acziuns, cura che nus essan preschents ordaifer ils studios da Besso e Comano.

Co plascha il bus al public?

Jau poss mo repeter quai che jau hai gia ditg: il public retschaiva la nova «Microlotta RSI» – nus n'avain anc betg chattà in meglier num, ma mintga idea e mintga proposta è bainvegnida – cun simpatia e mirveglias. Saja quai pervia da sia cumparsa u pervia dals products, servetschs e documentaziuns d'archiv – oravant tut documentaziuns ve-

glias, novitads e programs d'actualitad regiunala da RSI – che vegnan projectads sin il monitor grond u sin quatter moniturs pli pitschens.

Gea, jau schess che la summa dal vehichel sco tal, da sias furmas rundas e grassotlas, da ses stil da «vintage» è il vair secret dal success da noss nov transporter da promoziun che permetta da realisar cumpainamain ina da las finamiras strategicas da RSI: da cuntanscher e da scuntrar il public dapertut e cun tut ils meds a disposiziun: il radio, la televisiun, la purschida online, las medias socialas, ma era cun vehichels sco quest bus.

Daventar schurnalista tar RTR – fiss segir cool, ma ...

Avais Vus gia adina siemià da lavurar en il mund da las medias? Vulessas far ina midada professiunala u forsa participar ad in lavuratori en chasa RTR?

Tge dovri propi per daventar schurnalista u schurnalist? Quai avain nus vuli savair da Daniel Wasescha, il responsabel resursas umanas da RTR.

Daniel Wasescha, tge premissas dovri per daventar schurnalista tar RTR?

En emprima lingia dovri mirveglias, avertadad per temas, persunas e tecnica, persistenza ed abilitad da communitgar. E cler, dasperas dovri ina buna savida generala ed ina buna scolaziun da basa. Quella tanscha da l'empredissadi fin al studi academic. Impurtant da savair è era che la professiun da schurnalista è

fitg differenta, quai tut tenor en tge funcziun e redacziun ch'ins lavura (per exempel sco redactura da novitads, moderatur da televisiun, reporter da radio, redactura da multimedia u redactur da musica).

La diversidad è pia in criteri impurtant?

Gea, la diversidad sin plirs secturs: nus tschertgain persunas cun experientscha da vita sco era talas che stattan al cumenzament da lur carriera professiunala. La diversidad chattain nus er en las retschas da nossas collavuraturas e da noss collavuratur: tgi ha cumenzà sia

carriera schurnalistica sco redactur d'ina gasetta da scola, tgi aveva gia lavurà en ina chasa da medias, auters han fatg in studi schurnalistic u frequentà ina scola respectiva sco per exempel il MAZ (Center da scolaziun da medias) a Lucerna. Bliers cumenzan lur carriera schurnalistica era directamain tar RTR, han pia fatg avant tut insatge auter. Tgi è creschì si ordaifer il territori rumantsch e n'ha forsa gnanc gi la chaschun da frequentar ina scola rumantscha, tgi ha in background da migraziun ed auters han schizunt pir emprendì rumantsch, cura ch'els han cumenzà a lavurar tar RTR.

na era pronts da porscher fufragnadis e metter ensemen in program individual per accompagnar noss collavuratur e per guardar davos las culissas da la chasa da medias RTR.

Segir èn bliers scolars e giuvenils fascinads dal «far medias»?

Gea, e perquai avain nus er in'offerta speziala per persunas pli giuvnas. Uschia è RTR er adina preschent cun in stan d'infurmaziun a l'exposiziun grischuna da professiuns e furmaziuns FIUTSCHER. Lura datti era la pussaivladad da far ina visita en chasa durant il «di dal futur» ed er en il rom dal pass da vacanzas da la Pro Juventute datti onn per onn

Cun RTR al FIUTSCHER

Dals 14 fin ils 18 da november 2018 è RTR puspè stà preschent a l'exposiziun grischuna da professiuns FIUTSCHER a Cuira.

(rtr) La rulotta, nossa fatscha dals festivals da stad 2018, è stada amez l'exposiziun. Vita a la rulotta han dà noss moderatur giuvens Ivo Orlik e Natalia Murtas. Mintga di avain nus fatg radio directamain da l'exposiziun ed uschia laschè sentir il public a chasa il puls da l'exposiziun.

Nus avain dentant betg mo fatg radio live, mabain era purschè il giu

animà «mova Nina». Cun moviments u discurre è la figura da nossa moderatura dal Minisguard sa muventada. In giu che ha diverti ils visitaders dal stan da RTR.

Emprendistas ed emprendist, schurnalistas e schurnalists han dà pled e fatg davart las differentas professiuns e tge ch'i dovra per pudair lavurar tar RTR.

Nua san ins imprendder la professiun da schurnalista?

Quai è in tema che jau dastg adina puspè declarar: la professiun da schurnalista na pon ins betg cumparegliar cun in emprendissadi sco per exempel quel d'electricist. Damai che la schelta dad interpresas da medias rumantschas è pitschna, ha RTR installà in vast program che pussibilitescha d'entrar en contact cun il schurnalisssem e da scolar schurnalistas novAs en chasa RTR. Uschia ha RTR in'atgna partiziun che s'occupa cun la scolaziun, fa dentant era diever da l'offerta da la partiziun da scolaziun da SRF. L'empredissadi «classic» per daventar schurnalista u schurnalist tar RTR è l'uschenumnà stage. Quel è cumbinà cun la visita dal curs da diplom al MAZ e dura per regla dus onns.

E tge porscha RTR concretamain per vegnir en contact cun il schurnalisssem?

Per l'ina offrin nus gia dapi intgins onns regularmain il lavuratori «FAR MEDIAS» (guarda er inserat pagina 6). Durant in di dain nus la pussaivladad da vegnir en contact cun il schurnalisssem. Lura essan nus adi-

Tut las infurmaziuns en connex cun RTR sco patrun da lavur chattais vus sin rtr.ch/plazzas

bliers uffants che fan diever da l'offerta da visitar RTR. Ulteriurs projects per preschentar ad uffants e giuvenils las pussaivladads da lavurar tar RTR èn en lavur.

Quant bain ston ins savair rumantsch per lavurar tar RTR?

Il rumantsch è la lingua discurredda e scritta tar RTR. Tar nus en chasa discurre mintgin ses idiom. Tar la recrutaziun èn las enconuschientschas dal rumantsch sa chapescha er in factur. En discurs cun persunas interessadas constatesch jau adina puspè che bliers han l'impressiun da betg savair avunda bain rumantsch, e perquai na ristgan els gnanc da contactar nus, ubain da s'annunziar per ina piazza. Jau emprov lura adina dad intimar da tuttina far l'annunzia. Sco dapertut èsi era tar RTR uschia che l'experientscha – era quella linguistica – crescha cun lavurar en la professiun.



Durant l'exposiziun FIUTSCHER ha la rulotta da RTR funcziunà sco studio da radio.



Sco um da camera en il studio da RTR.



Tgi fa ils placats e las reclamas per RTR?



Tge fa atgnamain in programmer?

Di dal futur tar RTR

(pb) Accumpagnar durant in di da lavur in genitur u in'enconuschenta ubain simplamain fufragnar tar RTR. Ils 8 da november han 20 uffants dad 11 e 12 onns nizzegià questa chaschun e guardà sur las spatlas a collavuraturas e collavuratur da RTR a Cui-ra ed en l'Engiadina.



En il studio da la Televisiun Rumantscha.



Tagliar in film per il «Minisguard» – co va quai?



Co davent'ins moderatur da radio?



Responder ad in schurnalist da «social media».



Salidar amis durant l'ura da las gratulaziuns.



Di dal futur era tar RTR en l'Engiadina.



Esser «live» en il studio da RTR è cool.



Trics – grazia a la «greenbox».

Intelligenza artificiale per migliorare metadatas

Che l'intelligenza artificiale possa semplificare la lavoro da l'archivar è enconuschent (guarda la rubrica «1000 segns» dal settember 2018). Ch'ins pudess dentant era duvra l'intelligenza artificiale per migliorare las infurmaziuns en l'archiv – gliez hai jau emblidà da menziunar. Quai pudess vesair ora suandantamain: il mument ch'il sistem è trenà e «sa» rumantsch, pudess ins per exempel dir ad el: «Taidla tut las contribuziuns ch'èn en l'archiv da RTR, identifitgescha las personas ch'èn menziunadas u che discurren en

las contribuziuns, tge redactura ubain tge redactur che ha fatg la contribuziun e da tge tema ch'i tracta. Registrescha quellas infurmaziuns en la banca da datas.» Actualmain è quai anc in siemi, ed

contact cun l'Universitad da Turitg. Da quai project vegnis Vus segir anc ad udir dapli en quest lieu, dentant betg pli da mai. Quai è numnadamain stà mes ultim text per ils Accents, jau ma lasch

resch che questa rubrica or da l'archiv da RTR ha dà a Vus, prezias lecturas e prezias lecturs, ina pitschna invista en la lavur da la partiziun che na stat betg uschè en il focus sco autras da nossa chasa da medias, e che nus avain pudì far gust da fufragnar in pau en l'istorgia, en ils archivs da RTR. En quai senn, grazia fitg per l'atzenziun, e forsa che nossas vias sa cruschian insacura insanua auter.

1000 segns da l'archiv

avant ch'igl è definitivamain uschè lunsch ch'il sistem exequescha noss cumonds, datti anc bler da far. Per sviluppar ils programs e sistems necessaris stat RTR en

«archivar» – la fin da november hai jau surdà la responsabladad per la partiziun D+A a mes successur Bernard Bearth e fatg il pass vers la pensiun. Jau spe-

Alexi Monn, responsabel D+A

Al puls dal sport regional

En ils differents vecturs da RTR survegnan ils rapports e las reportaschas dal sport regional adina dapli impurtanza.

Ch'il sport – en spezial er il sport regional – è in element che vegn tgirà da RTR adina pli fitg, è era da vesair e d'udir en las emissiuns regularas e spezialas. En ils Sportissimos dal Radio Rumantsch da la fin d'emna è il focus sche pussaivel adina sin ils rapports regional. Era sch'ils auditors vegnan natiralmain er a savair ils resultats da la furmla 1 e da la Super League, metta RTR l'accent

sin las tematicas dal sport regional e grischun.

Adina pli savens producescha RTR era livestreams da sport, transmissiuns directas en tun e maletg ch'ins po guardar sin rtr.ch ubain sin PLAY RTR. Uschia è il derby da hockey en l'Engiadina gia in element fix en l'agenda da RTR, ed il medem vala era per ils derbys da ballape en Surselva ed ils finals da las dunnas e

dals umens da la cuppa grischuna da ballape. En tut hai dà durant il 2018 betg main che set livestreams dal sport regional – in'offerta esclusiva da RTR per nossas aspectaturas e noss aspectatur.

Redacziuns en las regions

Per pudair dar dapli paisa al sport regional lavuran plirs redactors da sport en las regions. Roman Dobler

è staziunà a Scuol e Georgina Janki ed Andreas Wieland a Glion. Uschia vegnan er ina gronda part dals magazins da sport da la fin d'emna, ils Sportissimos, emess directamain da l'Engiadina u da la Surselva. Quai adina puspè cun giasts en ils studios e cun temas d'impurtanza regionala.

Ursin Lechmann,
producent sport RTR



Ils 11 da november ha RTR rapportà live en tun e maletg dal derby sursilvan da ballape da 3. liga tranter Schluein Glion e Lumnezia. David Caduff, trenader assistent dal club da Schluein, dat pled e fatg ad Andreas Wieland, reporter da sport RTR.

Cuppa Spengler al Radio Rumantsch

Era quest onn rapporta RTR da la Cuppa Spengler a Tavau che cumenza ils 26 e finescha ils 31 da december. Al Radio Rumantsch pon ils fans da hockey tadlar tut ils

gieu interessants e decisivs directamain da Tavau. E vitiers datti ina u l'autra istorgia en connex cun il турниr tradiziunal.

Tour de Ski – sin ils chaltgogns da Dario Cologna

Dals 29 da december 2018 enfin ils 6 da schaner 2019 cumbattan ils megliers passlunguists dal mund per il titel dal Tour de Ski. RTR rapporta da las cursas il di da

Bumaun en la Val Müstair sco era da las cursas finalas cun l'ascensiun legendara sin l'Alpe Cermis en la Val di Fiemme.

Quai che Vus vulevas gia adina far, ma ...

Il project RtiR mussa la creatividad rumantscha zuppada. Tge creatividad? Quella da Vus tuttas e tuts. Quai ch'è RtiR vegn da Vus! Videos creativs, podcasts cun discussiuns davart Dieu ed il mund, maletgs or da tut las regiuns – u tut insatge auter: quai è RtiR. I ha gist cumenzà.

Forsa avais vesi il spot en il bus u en l'auto da posta. Forsa avais vesi il spot en il kino. Forsa avais gia vesi in u l'auter video ch'è marcà cun il pitschen logo da RtiR. RtiR ha cumenzà. Il num dal project da la partiziun Svilup da RTR è program. En quel project vai per tai – respectivamain Vus, stgisai ;) – e quai che ti – meglier ditg Vus, also propi, ehm ... – faschais. Tgi fa suenter il giu las pli interessantas e cumpetentas analisas da ballape enturn la maisa radunda, tgi fotografescha mintga di il medem lieu en ses vitg, tgi fa forsà videos da bellezza cuntradas u forsà schizunt pitschnas inscenaziuns? Quellas scenas, quels discurs, videos, audios e maletgs duain vegnir sin ils chanals da RTR: online, social media, radio, televisiun.

Tgi sauta qua?

E forsà has ti – ussa schain nus propi «ti», ok? – e forsà has ti gia vesi in clip da RtiR. Guarda sin il maletg qua speras ... jau spetg. Be dà in cuc. Ok? ... Bel, na? Quai è la sautunza Sofia fotografada e filmada da Kristina Matanoviç da Savognin. Ella purtretescha personas che aman il saut en pitschens videos elegants. Bel da guardar (ed en moviment anc pli bel che «mo» sin la fotografia). Per che pli blers vesian quai, collavura Kristina Matanoviç cun RTR. Quai è l'idea da RtiR. U forsà has era vesi las bellas impressiuns d'atun ch'ins sto simplamain guardar? Quai èn videos che Susi Rothmund metta ensemen adina lura, cura ch'ella vesa cun ses bun egl chaussas bellas. E quai sas era ti!

Ti collavuras

Aha – RtiR è pia ina plattafurma per cuntgens da tut gener? Naha! RtiR è



Ina fotografia per RtiR: la sautunza Sofia, purtretada da Kristina Matanoviç da Savognin, avant l'opera da Turitg.

collavuraziun – ina collavuraziun tranter tai e RTR. RTR po profitar da tia creatividad e ti pos profitar da RTR: dal know-how, dals meds technics, dals chanals da distribuziun. E co funcziuna quai? Ma ... Ti has ina idea; ti vuls forsà laschar tadar in public pli grond il discurs da tai e da tes collegas en l'ustaria suenter l'ultim giu da hockey da Tavau – lura scriva in e-mail a rtir@rtr.ch. Sche

ti dovras anc know-how co exact realisar tia idea u material tecnic (cameras, microfons, auter) po RTR procurar per quai. E sche tut funcziuna, lura vegn tes discurs sin ils chanals da RTR.

Ideas sturnas? T'annunzia!

Co fissi per exempel cun in'emissiun davart il ballape regional – da fans per fans? Co fissi cun ina seria

da videos co cuschinar ils megliers capuns? U co fissi cun la tura da Vrin fin a la tegia dal Terri filmada en 360°? Be dai: t'annunzia via rtir@rtr.ch u dà in cuc sin ils bels videos ed auter material sin rtr.ch/rtir

Michel Decurtins,
manader da project RtiR

Tranter lingias – RTR ed ils Dis da litteratura

Litterats e magliacudeschs han discutà als 28avels Dis da litteratura a Domat tge ch'è scrit tranter las lingias. Per RTR in'ulteriura occasiun d'interagir cun ses public.

(gd) Ils Dis da litteratura èn per RTR tant in'incumbensa sco er in'opportunitad. Per l'ina ans porschan talas occurrenzas la pussaivladad da bandunar il studio e dad esser cun il Magazin da cultura, ils Impuls ubain il Tavulin litterar tranter la gliעד u schizunt sin tribuna. Per l'autra è quai er ina schanza ed in'incumbensa da far diever da novas furmas e pussaivladads schurnalisticas che cumpiglian er auter ch'ils rapports tradiziunals al radio ed en la televisiun.

Tar e sin RTR

En lingia directa ha nossa redactura

Angela Hendry tegnì al current las audturas ed ils auditurs al radio da tut quai che curra e passa a Domat. Sch'i duvrava avant onns anc in char da transmissiun per far quai, basta oz ina lingia d'internet ed in telefonin in pau furber. E sco auters onns hai era puspè dà emissiuns spezialas davart e davent da Domat u era contribuziuns per il Telesguard.

Sper ils chanals tradiziunals è oz la purschida online il punct da cruschada, nua che tut las contribuziuns vegnan connectadas, uschia che mintgina e mintgin las chatta spert e las po tadlar e guardar cura e



Ils Dis da litteratura 2018: tranter las lingias, tranter ils cudeschs e tranter la gliעד.

nua ch'el vul ed eleger sez ses menu. La rait è en quest cas però dapli che mo in reservuar audiovisual. Ella porscha novas pussaivladads per raquintar istorgias e tractar tematicas bel ed aposta per quest chanal. Gia il terz onn avain nus rapportà online cun texts, tuns e maletgs successivamain da tut quai ch'è schabegià, vegnì ditg e preschentà durant quests trais dis. Tgi che ha interess po uschia era tadlar davent dal canapé ils texts nominads per il «Premi Term Bel 2018» u guardar co che las auturas ed ils auturs prelegian lur pli novs «Impuls». La pagina rtr.ch sco chanal spert ed actual, dentant er ina sort da bibliote-

ca cun las contribuziuns dals auters chanals. Plinavant in lieu per supplements spezialas, en quest cas ina sort da lexicon davart «Nossas auturas e noss auturs» che vegn lura amplifitgà ed actualisà successivamain.

Las emissiuns e tut ils detagls dals Dis da litteratura 2018 chattais Vus sin rtr.ch/cultura/nossa-litteratura/dis-da-litteratura-2018



Grazia ad in'app sin il telefonin è Angela Hendry spert live a l'emettur.

Nov commember rumantsch per l'UBI

Il Cussegl federal ha elegì Armon Vital, giurist a Scuol, sco commember da l'Instanza independenta da recurs da radio e televisiun (UBI). Plinavant daventa Mascha Santschi Kallay la nova presidenta da l'UBI. Il 1. da schaner 2019 surpiglia ella quest post da Vincent Augustin ch'è stà commember da l'UBI dapi il 2013 e che ha presidià il gremi dapi il 2016. Augustin è sa retratg da l'uffizi, perquai ch'el è vegnì elegì sco president da la SRG SSR Svizra Rumantscha.

RTR a la tschertga dal Pled Rumantsch 2018

(rtr) Navada, sitgira, cartel? Tge pled ha fatschentà il pli ferm la Svizra rumantscha durant il 2018? Per far in zic pli simpel da sa decider, preselecziunescha ina giuria tschintg plets or da tut las propostas ch'il public ha inoltrà fin ils 2 da december.

Tge tschintg plets che quai èn precis e pertge che la giuria è gist sa decidida per quels, han ins pudì tadlar il di da Son Niclà, ils 6 da de-

ember, en il Radio Rumantsch. L'ultim pled en chapitel ha dentant il public che po decider via voting online sin la pagina d'internet rtr.ch, tgenin dals tschintg plets che daventa il Pled Rumantsch 2018. La persuna che ha inoltrà il pled-victur survegn sco premi in bel marenghin. Il pled-victur vegn communitgà mesemna, ils 12 da december, a las 12:00 tar RTR.

Ils plets rumantschs dals ultims onns

- 2017 flutgets
- 2016 barbatiat
- 2015 schischuri
- 2014 far linlogn
- 2013 raffader
- 2012 arsuc
- 2011 tgutglar

2 x Nadal – parter il plaschair

Far in regal e gidar, quai è la finamira da l'acziun che vegn organisada per la 22avla giada. Ensemen cun RTR e cun ils chantauturs Alexi e Marcus pudais era Vus parter il plaschair.

(vs) En lur chanzun «Siemi da Nadal» chantan Alexi Nay e Marcus Hobi dal plaschair da gidar il con-carstgaun. Il medem intent ha era l'acziun 2 x Nadal che vegn organisada mintg'onn da la SRG SSR ensemen cun la Posta Svizra, Coop e la Crusch Cotschna. L'acziun che cumenza ils 24 da december e cuzza fin ils 11 da schaner 2019 vul gidar e sustegnair persunas che na vivan betg en abundanza.

Cun in pachet en chasa RTR Ils 3 da schaner 2019 As envida RTR da purtar sperasvi Voss regals a favur da persunas basegnusas. Giavischads èn cunzunt pachets cun artitgels per il basegn da mintgadi sco mangiativas conservablas, artitgels d'igièna e termagls per uffants. A partir da las 14:00 fin las 17:00 è averta la cafetaria da RTR a Cuira per in e scadin.

Tgi che porta in pachet po giudair la cumpagnia cun petta e café e cun chant d'Alexi e Marcus. Ed alura na po era questa chanzun betg mancar:

Quei ei Nadal, jeu hai semiau aschia / Nadal cuzzava buca mo in di ad onn / Fuv'egl intern da tei e mei, ei cor da mintg'affon / Ei quei buc Nadal, semiau hai jeu aschia.




Durant l'acziun pudais Vus dar si Voss pachet senza adresa cun la remartga «2 x Nadal» a mintga spurtegl da posta ed el vegn tramess gratuitamain a la Crusch Cotschna Svizra.

En memoria



Lelja Maissen-Tasch
(*1927 – †2018)


Lelja Maissen-Tasch, la perscrutadora da sauts populars, è naschida en la Croazia. Durant plirs decennis ha ella accumpagnà l'emissiun per persunas dals stadis da l'antieriura Jugoslavia, che radio DRS emetteva adina la sonda suentermezdi. Questas emissions realisava ella mintgamai en il studio da RTR a la Via dal teater a Cuira. Lelja Maissen-Tasch, ch'è stada maridada cun prof. dr. Alfons Maissen b.m., è morta ils 25 d'avust 2018 en la vegliadetgna da 91 onns.



Plasch Barandun
(*1925 – †2018)

Lavurà ha Plasch Barandun sco pur e postin. Dal 1982 fin il 1992 è el stà president communal da Veulden. Enconuschent è l'autodidact cunzunt stà sco perscrutader e publicist da l'istorgia culturala da Veulden.

Fascinà da ses vitg natal ha el publicità numerusas scrittiras ed era fundà in museum a Veulden. L'onn 1991 è el vegni undrà per ses meritis en favur da la lingua e cultura rumantscha cun il premi CRR. Plasch Barandun è mort ils 2 da settember 2018 en la vegliadetgna da 93 onns.



Paul Michael
(*1933 – †2018)

Paul Michael è naschi e creschi si a Donat en la Val Schons. Sper sia lavur professiunala sco inspectur d'assicuranza sociala è el era stà activ en la suprastanza da la Renania e sco redatur da la part sutsilvana dal «Calender per mintga gi». L'onn 1991 è el vegni elegi da la radunanza generala sco commember da la suprastanza e cassier da la CRR, a la quala el è lura stà fidaivel – l'ultim sco commember dal cussegl regional – enfin la fin da l'onn 2003. Paul Michael è mort ils 5 da settember en la vegliadetgna dad 84 onns.

Serafe enstagl Billag

Il quint per las taxas da radio e televisiun vegn d'ina nova interpresa.

(rtr) A partir dal schaner 2019 datti midadas en connex cun las taxas da radio e televisiun. Cun approvar la revisiun da la lescha da radio e televisiun (LRTV/RTVG) il zercladur 2015 ha la populaziun acceptà ina midada dal sistem da las taxas liadas a l'apparat al sistem lià a la chasada. Uschia han las chasadas da pajar a partir da l'onn proxim 365 francs ad onn empè da 451 francs sco fin qua. Ils quints na vengnan betg pli da l'interpresa Billag, mabain da la Serafe (Schweizerische Erhebungsstelle für die Radio- und Fernsehgebühren). Dapli infurmaziuns sin srgssr.ch/rm/novitads-e-medias/faq

serafe

Buns resuns per la revista Accents

En l'ultima seduta dal 2018 è il Cussegl dal public da la SRG.R s'occupà cun la pagina nossaistorgia.ch/ils Accents e l'emissiu naziunala «Gli altri, Ils auters, Les autres, Die Anderen».

La plattafurma nossaistorgia.ch, ch'è vegnida lantschada l'october 2017 da RTR en collavuraziun cun la fundaziun Fonsart, è l'emprima plattafurma digitala, istorica e participativa da la Svizra rumantscha e dal Grischun. Sin nossaistorgia.ch pon privats ed instituziuns metter online lur fotografias, videos u documents e parter quels cun la comunitad. Il Cussegl dal public (Cdp) è intgantà da quest'idea. I dovria in zic temp per vegnir a frida cun la navigaziun, ma ina giada ch'ins haja chapì il sistem saja quai fitg interessant da sfegliar en regurdientschas e reminiscenzas. La funcziun da tschertga gidia fitg bain da chattar quai ch'ins tschertga. Ultra da quai dettia quai era divers filters che simplifitgeschian la lavur. Il Cdp fa in grond compliment per l'idea e la realisaziun. Quai saja in project che duess en mintga cas cuntinuar.

Ils Accents plaschan

Bun format, bun layout e buns cuntegns. Quai è il facit ch'il Cdp fa suenter avair prendì sut la marella las ultimas ediziuns da la revista che cumpara quatter giadas l'onn. La publicaziun che exista dapi il 2010 vegn tramessa a tut las collavuraturas e collavuratur da RTR, a tut las commembras e commembers da la SRG.R ed ad ulteriuras abunentas ed abunents che s'interesseschian per quai che capita tar RTR e la SRG.R. Al Cdp han en spezial las infurmaziuns en connex cun las collavuraturas ed ils collavuratur da RTR plaschi ordvart bain. Quai dettia ina colliaziun famigliara tar RTR. Ins emprendia d'enconuscher ils novs en il team da RTR e vegnia er infurmà sche insatgi bandunia l'interpresa. La gasetta infurmeschia dentant era dad innovaziuns tar RTR,



Il Cussegl dal public SRG.R s'inscuntra regularmain per prender sut la marella l'offerta da RTR. Retscha davos da sanestra: Tina Vulpi, Pascal Gian Caminada, Adrian Viletta, Ursin Defuns, Alexi Nay. Retscha amez: Selina Crivelli, Giancarlo Conrad, Carmen Dedual, Roger Tuor (president). Retscha davon: Lucrezia Berther, Claudia Nicolay-Nuotclà, Curdin Tuor, Gion Capeder, Giana Valeria Sonder, Ursina Schmed-Cathomas.

novas emissiuns, novas ideas e projects e dettia era la pussaivladad da guardar davos las culissas da l'interpresa.

Mintgatant po il Cdp era crititgar «ils auters»

«Gli altri, ils auters, les autres, die Anderen» – uschia sa numna l'emissiu che vegn emessa da la RSI, da RTR, da RTS e da SRF. Ils cussegls dal public da las uniuns purtadras

da la SRG SSR han per ina giada guardà sur cunfin ed analisà las emissiuns che van sin auters emetturs. Il Cdp da la SRG.R è vegnì a la conclusiun che tar RSI e RTR saja questa emissiu plazzada bain ed i dettia bunas infurmaziuns supplementaras sin lur paginas d'internet. Tar RTS e SRF dettia quai anc potenzial da megliar. Là na dettia quai strusch avis sin l'emissiu, per exempel en furma da trailers u in-

furmaziuns supplementaras en la rait. Quai saja donn, pertge l'emissiu sezza saja divertenta ed attrattiva. I dettia buns temas ord las regiuns che fetschian gust sin dapli. L'auditur possia adina puspè far l'experiencia: aha, quai datti en la Svizra taliana, rumantscha, franzosa e tudestga

Roger Tuor, president dal Cussegl dal public SRG.R

**DAVENTAI COMMEMBER
DA LA SRG.R**

SRG SSR

Contribuziun annuala:
CHF 20.– per personas singulas
CHF 30.– per uniuns
CHF 80.– per personas giuridicas

Dapli sut srg.ch

Tschintg dumondas a Nadja Clopath (42), Cuira

Commembra e commembers da la SRG.R vegnan a pled

Nadja Clopath, pertge essas Vos commembra da la SRG.R?

Jau sun gia dapi tschintg onns commembra da la SRG.R. Cunquai che jau hai lavurà bunamain diesch onns a Turitg ed a Berna, sun jau adina puspè vegnida plectada pervi dal rumantsch. Per esser al current aveva jau abunà «La Quotidiana». Per supportar meglier l'encreschadetgna tadlava jau era regularmain il Radio Rumantsch e guardava las emissiuns rumantschas en la televisiun. En la Bassa reagiva mes conturn adina positivamain, sche jau scheva che jau saja da lingua rumantscha.

Tge spetgais Vos da la SRG.R?

Da la SRG.R spetg jau professiunalitad e la preschientscha basegnaivla en l'entira Svizra. La lingua rumantscha duai vegnir tgi-

rada ed integrada en il mintgadi. Impurtant è era che la lingua viva e ch'ella vegnia dada vinavant da generaziun a generaziun. Quai po la SRG.R sustegnair cun ses program da radio e televisiun per rumantsch.

Tgeninas èn Vossas emissiuns preferidas da RTR, e pertge gist quellas?

Las novitads al radio per esser infurmada, ils Cuntrasts da la Televisiun Rumantscha pervi da las infurmaziuns cun valurs da divertiment, il Telesguard pervi da las novitads or da las regiuns.

Giavischs, critica e laud per RTR?

Jau giavisch vinavant bler success a RTR. A mai èsi dà en egl positivamain che RTR sa preschenta a moda dinamica, flexibla ed innovativa. I vegn adina puspè



Nadja Clopath, specialista da marketing da personal en l'ospital chantunal, è creschida si a Panaduz e viva a Cuira.

empruvà insatge. Quai ma plasha fitg bain. Era per persunas pli giuvnas porscha RTR insatge, per exempel il Minisguard. Mes giavisch per il futur fiss ch'ins udiss dapli l'idiom sutsilvan tar RTR.

Tge impurtanza ha per Vos la lingua rumantscha?

Il rumantsch munta per mai fitg bler. Cunquai che jau sun creschida si en in lieu tudestg, a Panaduz, ma mancan mintgatant ils plects rumantschs. Jau hai emprendi rumantsch sutsilvan da mes geniturs. Omadus èn Rumantschs. Jau sun fitg engraziavla ch'els m'han dà vinavant questa lingua. Perquai emprov jau uss era da discurren cun mia figlia mo rumantsch – sa chapescha sutsilvan.

«Pled sin via» da Nadal cun l'avat Vigeli Monn

Il pled sin via è la versiun rumantscha da l'emissiun «Das Wort zum Sonntag». L'emissiun che vegn transmissa en la televisiun sin SRF 1 tracta patratgs cristians, dumondas religiusas, spiritualas u eticas, e quai quatter giadas l'onni il venderdi sontg, da Tschuncaisma, il 1. d'avust e da Nadal. L'emissiun

vegn moderada en roda da Cornelia Camichel Bromeis, decana da Tavau, Flurina Cavegn-Tomaschett, gidantra pastorala da Breil e da l'avat Vigeli Monn.

Il «Pled sin via» da Nadal vegn emess ils 25 da december a las 19:20 sin SRF 1.

L'avat Vigeli Monn è naschi l'onni

1965 ed è oriund da Tujetsch. Cun 23 onns è el entrà en la cuminanza benedictina da Mustér, nua ch'el lavura sper ses uffizis era sco magister da latin e da religiun. El è stà statalter e lura decan da la claustra. Ils 19 d'avrigl 2012 è el vegni elegi sco nov avat da la claustra da Mustér.



«Pled sin via» 2019

- venderdi, ils 19-4, 19:20 sin SRF 1, cun Cornelia Camichel Bromeis
- sonda, ils 8-6, 20:00 sin SRF 1, cun l'avat Vigeli Monn
- sonda, ils 27-7, 20:00 sin SRF 1, cun Cornelia Camichel Bromeis
- mesemna, ils 25-12, 19:20 sin SRF 1, cun Flurina Cavegn-Tomaschett

Il «Pled sin via» da Nadal

vegn emess ils 25 da december a las 19:20 sin SRF 1.



Bellas festas da Nadal e tut il bun per il 2019

«Chara, bella Engiadina» – l'ultim Top Pop Rumantsch

(rtr) Suentar avair chantà e sunà ac-
cordeon e clavazin en diversas grup-
pas ha Sidonia Caviezel (sin la foto a
sanestra) da Martina entupà per ca-
sualitad Nina Mayer da Ramosch,
medemamain deditgada ferventa-
main al chant. Ellas na partan betg
mo in sumegliant passà e preschent
musical – scolaziun classica, magi-
stras da musica, dirigentas – surtut
èn ellas surpraisas da la congruenza
armoniusa da lur vuschs. La chan-
zun tschernida dad ellas per il pli nov
Top Pop Rumantsch da RTR è in
omagi a l'Engiadina.



Chara Flurina

En il rom dals Dis da litteratura a Domat ha gi lieu l'ultima part da la
turnea «Sin il viv!». Sin questa turnea has ti envidà auturas ed auturs
dals Impuls dal Radio Rumantsch per preleger davant public. A Domat è
il public per exempel vegni a savair che Jessica Zuan scriva per ordinari
mo lirica – mo per ils Impuls da RTR scriva ella uss era prosa. Il medem
vala per Carlo Beer che n'aveva anc mai scrit per il public, fin che ti has
gudagnà el sco autur dals Impuls. In grond applaus has ti survegni per
tia lavur da «coach» che cusseggia e che propona era nua scursanir ils
texts, per ch'els daventian pli expressivs. Quest applaus vulesch jau
prender si e dar vinavant da tut cor. Tia lavur sco recrutadra da novs
talents litterars è impressiunanta, la passiu, cun la quala ti accumpo-
gnas auturas ed auturs, immensa. Ti has surpiglià la stad 2016 la
redacziun dals Impuls da Rita Uffer – betg ina simpla ierta, savend dals
gronds merita da tia antecessura. Cun iertas pon ins dentant adina ir
trais vias: mantegnair, reducir u sviluppar vinavant ellas. Ti has
tscherni la terza via – quai sent'ins di per di al Radio Rumantsch. In
cordial grazia fitg.

Ladina

Ladina Heimgartner



Dunna
Flurina Badel
Redactura Impuls
Radio Rumantsch
Via da Masans 2
7000 Cuira